

Alang Sa Unsa Gihatag Ang Espiritu Santo?



Kita n'yo, si Igsoong Neville nagatoo sa pagpandong og mga kamot.

Nakita nako nga aduna ko'y pipila ka mga pangutana dinhi. Bueno, basahon nako kini ugma sa gabii, tungod kay wala na ako'y panahon sa pagtan-aw sa mga niini karong gabhiona para kaninyo, tingali mahitungod kini sa Mensahe sa kagabii. Karon, kung adunay ma'y pangutana bahin sa bisan unsa man nga Mensahe, mahimong ibutang usá ninyo kini dinhi usa lang ka gabii, ug ako kanang tubagon sa sunod nga gabii.

² Bueno, ugma sa gabii buut nako nga makakita, o makakuha, diay, og pipila ka mga ministro, kung mahimo; kung dili man, mga pipila ka maayo, ug masaligan nga mga lalaki o babaye nga mahimo natong tawagon sa panahon sa panginahanglan, nga kung mahitabo man . . .

Ugma sa gabii magsugod kita, human sa Mensahe, sa pagpandong og mga kamot, ug, alang sa Balaang Espiritu. Ug dayon, adunay usa ka . . . Kamo adunay pribilehiyo nga mopabilin dinhi kung gusto ninyo, sa tibuok panahon sa bakasyon, bisan nagkinahanglan pa og unsa ka dugay hangtud mamatay. Ug dayon—dayon, kung dili, puede ra pud kung buut ninyong mouli sa kaugalingon n'yong panimalay, ug, malipay ra pud mi, kung makakaplag mo og usa ka dapit diin . . . Kung naglibog mo kung asa mo moadto . . .

Buot namong makuha ang gidaghanon sa ministro, ang ilang gidaghanon, kung sila mga bisita lang dinhi; ang ilang gidaghanon, kung asa sila temporaryong nagsaka, diin makontak nato sila dayon; ug ang usa makaadto sa usa ka balay, ang usa sa usa na pud ka balay, ug ang usa sa uban pa, aron mahatagan kamo nila og mga pagtudlo, kamo nga nagtinguha niining dakong panalangin nga atong ginahisgotan, nga mao ang bautismo sa Espiritu Santo.

³ Kagabii naghisgot kita sa, “kung unsa Kini.” *Unsa Ba Ang Balaang Espiritu?* Ug atong hingsayran nga Kini mao ang halos tanan, nga gisaad sa Dios kanato. Uh-huh. Diha Niini atong nakaplagan kung unsa gayud ang gikinahanglan sa Iglesia sa Dios. Hingsayran nato nga Kini mao ang selyo, ang Maglilipay, ang kapahulayan, ang kalipay, ang kalinaw, ug ang pagkabanhaw. Ug ang tanan nga gisaad sa Dios sa Iyang Iglesia, napahimutang diha sa Balaang Espiritu.

⁴ Ug karon, karong gabhiona, gusto namong magwali, o maghisgot, magtudlo. . . Aduna ako'y mga tulo o upat ka panid sa mga teksto dinhi, o mga Kasulatan, mahitungod Niini, diin. . . Kagabii nabiyaan nako ang akong Cruden's Concordance nga nakapahimutang dinhi, ug wala nako kini makuha. Maong kinahanglan nakong tun-an ang tanan nga akong mahimo karon gamit ang mga Kasulatan. Karon, ug ugma. . . Karong gabhiona magapanudlo kita mahitungod sa: *Unsa Ang Katuyoan Sa Dios Sa Pagpadala Sa Balaang Espiritu?* Para sa unsa Kini? Kung Kini usa ka halangdon kaayo nga butang, nan nganong gipadala Kini sa Dios?

⁵ Dayon, ugma sa gabii gusto natong maghisgot mahitungod sa: *Para ba Kini Kanimo?* ug *Unsaon Nimo Pagkabaton Niini?* ug *Unsaon Nimo Pagkahibalo Kung Anaa Na Kini Kanimo?*

Ug dayon, human nato mahisgotan kana, pinaagi sa mga Kasulatan, human nga maisaysay kini pinaagi sa mga Kasulatan, gamit ang mga Kasulatan alang sa tanan nga mga butang, nan kadtong nagatinguha sa Espiritu Santo puede nang moduol dinhi unya. Ug ako nanghinaut nga ang rebaybal magpadayon, sukad niana, aron makapadayon kita diha sa pagpabaton sa Balaang Espiritu.

⁶ Bueno, tungod kay ugma sa gabii daghan siguro ang magpabilin og dugay sa mga lawak sa simbahan, gibati nako kung makahangyo unta kita og daghang mga ministro kung mahimo ug kadtong mga tawo nga adunay kasinatian sa paggiya sa mga tawo sa pagdawat sa Balaang Espiritu, alang sa pagdasig kanila, sa pag-adto sa panimalay sa—usa ka babaye ug iyang bana, o—o sa kadtong tawo nga nagatinguhang makabaton sa Balaang Espiritu, kadtong mga natudloan og ayo kung unsa ang angay'ng buhaton.

Kung mahimo n'yong ihatag ang inyong numero sa telepono o address nganha sa pastor, karong gabii o ugma sa gabii. Ihatag lang kini kang Igsoong Neville, aron dili na kita mogahin og lain pang panagtigum para lamang niini nga bahin. Ihatag lang ang inyong numero sa telepono kung asa namo kamo makontak. Ug moingon, “Andam na ko, ug kung kami. . . kung buot ko ninyong paadtoon sa usa ka balay.” Kung kini usa ka—usa ka babaye nga nag-inusara, nan kinahanglan nga babaye usab among ipadala, kita n'yo, alang niining babaye. Ug dayon, kung kini usa ka panimalay diin adunay usa ka lalaki ug ang iyang asawa, aba, makapadala kami og usa ka ministro.

Ug malipay gyud kami nga makigduyog ka kanamo, tungod nahibalo ko nga kamo, ang matag usa kaninyo, interesado niini, niining labing mahinungdanon. Ug hinumdumi, “Ang nagaluwas og usa ka kalag gikan sa kasaypanan niini, nagatabon sa daghang mga sala.” Kita n'yo? Ug ang Pangasaw-onon

ni Cristo gigutom ug giuhaw. Nagabati siya'g kasakit, aron ihmugso ang mga anak sa Dios.

⁷ Ug karon, karong gabhiona, sa dili pa nato basahon ang mga Kasulatan, iduko nato ang atong mga ulo sa makadiyut alang sa pag-ampo. Ug sa dili pa kita mag-ampo, kamo nga nagaduko sa inyong mga ulo, aduna ba kamo'y hangyo? Ipataas lang ang inyong mga kamot ug magaingon, "Ginoo, mahinuklugon kong nagapataas sa akong mga kamot. Aduna ko'y panginahanglan. Nagapangamuyo ako nga tabangan Mo ako, Oh Ginoo." Panalanginan sa Dios ang matag usa kaninyo. Nakita Niya ang inyong mga kamot. Gisulat na sa mga Manolunda ang inyong mga pangaliyupo.

⁸ Ug, Langitnong Amahan, mianhi kami karon, nagaduol Kanimong pag-usab diha sa pag-ampo. Nga, sa walay pagduhaduha nahimo na ang mga pag-ampo taliwala sa mga anak sa Dios karong gabhiona, niining gamay nga dapit, ug gikanta na namo kanang mga kalantahon, ug among gibayaw ang among mga kasingkasing sa malipayong pagmaya alang sa mga pagdayeg sa Dios.

⁹ Miingon si David nga siya nagasulod sa kongregasyon sa mga balaan ug ginapahibalo ang iyang mga paghangyo. Ug karong gabhiona, adunay daghang mga kamot. Tingali, siguro, ako moingon, otsenta porsyento sa mga naglingkod niining bildinga karong gabhiona nagpataas sa ilang mga kamot alang sa mga paghangyo. Nagapakita lang, Ginoo, nga dili kami makapadayon kung wala Ka. Kinahanglan gayud nga anaa Ka kanamo, sa matag adlaw. Ikaw ang among Kinabuhi, among kalipay, among kahimsog-sa-panglawas, among kusog, among dalangpanan, among panagang, among taming gikan sa kaaway.

Ug dili kami makalahutay niining gubat sa kinabuhi kung wala Ka. Imposible gayud para kanako sa pagbuhat niini, ug kinahanglan kami nga bug-os nga mosalig Kanimong. Sanglit, nasayod kami nga nagalakaw kami sa usa ka mangitngit ug magul-anon nga yuta. Ngani sa matag kiliran nagapalibot ang kaaway sa amoa, sa paghatag ug mga lit-ag ug mga bitik. Ang among mga alagianan, Ginoo, napuno sa mga lit-ag sa kaaway, aron gubuton kami.

¹⁰ Ug nasayod, usab, kami, nga sa tumoy sa dalan adunay hataas, malandongon nga walog nga gitawag og kamatayon nga latas namong pagalakwan. Oh Ginoo, kinsa man ang mokupot sa among mga kamot? Gusto namong maila Ka karon, Ginoo. Gusto namong mahibaloan nga Imong gikuptan ang among mga kamot, ug amo pud nakuptan ang Imong kamot, aron kami makabaton nianang nakaangkla na nga kasigurohan nga kon kami moabot na nianang katapusang takna sa among kinabuhi, nga pasulod na nianang pultahan nga gitawag og kamatayon, makaingon kami uban sa mga balaan kaniadto, "Ako nakaila Kaniya sa

gahum sa Iyang pagkabanhaw, ug ako nasayod nga sa diha nga Siya magatawag, ako magabangon gikan sa mga patay.”

¹¹ Karon, Amahan nga Dios, kami magaampo nga Imong panalanginan ang among mga paghangyo ug ang among panagtigum. Panalangini ang Imong mga Pulong. Ug kon ako makasulti ug bisan unsa nga supak sa Imong Pulong o sa Imong kabubut-on, Aduna gihapon Kanimong ang gahum sa pagtak-um sa akong baba, sama sa Imong gibuhad didto sa langub sa mga leon kaniadtong atua si Daniel didto. Ug kami nagaampo, Ginoo, nga Imong ablihan ang mga dalunggan ug mga kasingkasing karong gabhiona, aron, ug magpahinungdan Ka kanila og kagutom ug kauhaw. Hinaut nga sila pagauhawon og ayo nga dili sila makatulog o makapahulay, bisan asa man, hangtud nga miabot ang Maghuhupay.

¹² Kami nagatoo nga nagkinabuhi na kami sa katapusang mga adlaw, diha sa landong sa Iyang Pag-abot. Ug mao kana ang gitumong niining mga Mensahe, Ginoo. Alang kini sa mga tawo aron sila makabantay, ug mapasidan-an. Ug unta, karong gabhiona, amo nang pagatangtongan ang kabhang, karon mismo, ug ipadaplin kini sa lingkoranan, nga magaingon, “Ginoong Dios, ako usa ka sudlanan Kanimong. Itugot nga ang Imong Espiritu modagayday pinaagi kanako. Umula ug buhata ako sumala sa Imong kabubut-on. Itugyan ko ang akong kasingkasing, akong kusog, akong tanan-tanan, alang sa Imong katuyoan.”

¹³ Patalinghugi kami, Ginoo. Wala kami mianhi aron magpakita, niining ting-ulan nga gabii. Wala kami mianhi sa hinungdan nga wala kami’y kapaingnan. Ania kami alang sa usa ka maligdong, sagrado, balaan nga katuyoan sa among mga kasingkasing, nga mao, ang pagpaduol nganha Kanimong, ingon nga nahibalo nga Ikaw misaad nga kon kami moduol Kanimong, Ikaw mopaduol sab kanamo. Ug mao nga ania kami karon. Ingon nga ang nagasulod nga gigutom dili mogawas nga gigutom. “Bulahan ang mga gigutom ug giuhaw sa pagkamatarung,” miingon si Jesus, “kay sila pagabusgon.” Ug kon mangayo kami og tinapay, dili kami makadawat og bato. Aduna kami og ingon niana nga kasigurohan. Ug kon kami mangayo og isda, dili kami makadawat ug bitin. Apan, ang Dios nga among Amahan magapakaon kanamo sa Mana gikan sa Langit, sa Iyang Pulong ug sa Iyang Espiritu nga nagpamatuod mahitungod Kaniya. Tubaga ang among mga pag-ampo, Ginoo, ug ang among mga hangyo, samtang nagpaabot kami Kanimong. Sa Ngalan ni Jesus Cristo kami nagaampo. Amen.

¹⁴ Karon, kamo nga nagasulat niining mga Kasulatan, mobalik kita pag-usab ngadto kang San Juan, sa ika-14 nga kapitulo. Magasugod kita sa ika-14 nga kapitulo sa San Juan. Ug sugdan nato sa ika-14 nga bersekulo, San Juan 14:14, ug basahon

lang nato ang usa ka bahin niini nga Kasulatan. Karon, ania dinhi makit-an ang kadaghanan sa konteksto nga gusto nakong hisgotan karong gabhiona.

¹⁵ Ug hinumdumi, kamo nga adunay mga Biblia nga may pula nga letra, kini nakapula tungod, mao kini. Kini ang mga Pulong nga gipanulti ni Jesus Mismo, busa makasalig kita nga mao gayud kini eksakto kung unsa ang Iyang giingon. “Ang langit ug ang yuta mahanaw, apan ang Iyang Pulong dili gayud mapakyas.”

Karon atong pagabasahon gikan sa ika-14 nga bersekulo sa ika-14 nga kapitulo.

Kong kamo mangayo bisan unsa sa akong ngalan, akong pagabuhaton kini.

Pagkabulahan nga saad!

Kong nahagugma kamo kanako, magabantay kamo sa akong mga sugo.

Ug ako magaampo sa Amahan, ug siya magahatag kaninyo ug lain nga Maglilipay, aron siya magpuyo uban kaninyo sa walay katapusan;

Nga mao ang Espiritu sa kamatuoran; nga ang kalibutan dili makadawat, kay dili niya makita siya, . . .

Karon, kamo nga nagbasa gikan sa usa ka Griyego nga Biblia, makita kini dinhi, dili. . . Ang pulong nga *makita* dinha nagapasabot og “aron masabtan.” “Kay ang kalibutan wala makasabot Kaniya.” Tinuod gyud kana. Tugoti ako nga basahon kini pag-usab karon.

Nga mao ang Espiritu sa kamatuoran; nga ang . . . kamatuoran; nga ang kalibutan dili makadawat, kay dili niya makita siya, bisan maila: apan kamo makaila kaniya; (Kinsa? Ang Maglilipay.) kay mopabilin siya uban kaninyo karon (sa pagkakaron), . . . kay mopabilin siya uban kaninyo, ug anha kaninyo.

Unsa man Kini? Ang mao rang Maglilipay.

Dili ko kamo pagabiyaan nga mga ilo: Ako . . .

Si bisan kinsa nahibalo gayud nga ang “Ako” usa ka personal nga pulingalan.

. . . magabalik ako kaninyo.

Sa diriyut lamang panahon, ug ang kalibutan dili na makakita kanako; apan kamo maka . . . apan kamo makakita kanako: Kay ako mabuhi, kamo mabuhi usab.

Nianang adlaw masayod kamo nga ako anaa sa akong Amahan, ug kamo ania kanako, ug ako anaa kaninyo.

Mao kini ang sentro sa akong ideya, apan basahon pa nato ang sunod. Tugoti ako nga basahon usab kana karon, pag-usab.

Nianang adlaw (ang dakong adlaw, ang adlaw sa paghukom), nianang adlaw masayod kamo nga ako anaa sa akong Amahan, ug kamo ania kanako, ug ako anaa kaninyo.

Ang nagabaton sa akong mga sugo, ug nagatuman kanila, kana mao ang nahagugma kanako: ug ang nahagugma kanako pagahigugmaon sa akong Amahan, ug ako mahagugma kaniya, ug sa akong kaugalingon magapahayag kaniya.

Miingon kaniya si Judas, nga dili ang Iscariote, Ginoo, unsa kaha ang mahatabo nga ikaw magapahayag sa amo, ug dili sa kalibutan?

Mao kanang, *kosmos*, ang “sistema sa kalibutan.” Kung naay sinulat dinha sa daplin sa imong biblia, mamatikdan nimo kana. Ang akoa kay “g,” ug kini nagaingon dinhi, “*kosmos*, o sistema sa kalibutan.” Mao kana ang mga iglesia, ug uban pa, kita n’yo.

. . . unsa kaha ang mahatabo nga ikaw magapahayag sa amo, ug dili kanila? Unsaon Nimo pagbuhat kini?

Si Jesus mitubag ug miingon kaniya, Kong kinsa ang nahagugma kanako, magabantay siya sa akong pulong: (amen) ug ang akong Amahan mahigugma kaniya, ug kami moanha kaniya, ug ang among puloy-anan himoon diha kaniya.

Ang dili mahagugma kanako dili magabantay sa akong mga pulong: . . .

Puedeng tumanon ang mga panudlo sa iglesia; apan mas tumana n’yo ang Iyang mga gipamulong, nakita n’yo.

. . . ug ang mga pulong nga inyong hingdunggan dili ako, kondili sa Amahan nga nagsugo kanako.

Kining mga butanga ginapamulong ko kaninyo, sa nagapuyo pa ako uban kaninyo.

Apan ang Maglilipay, ang Espiritu Santo, nga pagasugoon sa akong Amahan sa akong ngalan, siya magatudlo kaninyo sa tanang mga butang, ug magapahinumdum kaninyo niining (kana mao, ang Iyang mga Pulong) tanan, nga akong gipamulong kaninyo.

Unsa man ang katuyoan nga gipadala sa Dios ang Balaang Espiritu kung ingon-ana? Hinaut nga Iyang idugang ang Iyang mga panalangin sa Iyang Pulong.

¹⁶ Si Jesus miingon, nga, “Nianang adlaw masayod kamo nga ako anaa sa Amahan, ug ang Amahan ania Kanako; ug kamo . . .

Ako anaa kaninyo, ug kamo ania Kanako.” Karon, kung atong isulti kini. . .

¹⁷ Karon, hinumdumi, kini marekord sa teyp.

Usa ka Cristohanon nga negosyante, gikan sa Louisville, ang mitawag kanako kaganina. Ug siya miingon, “Makauulaw, Billy, nga kining mga Mensahe, sama sa imong gipangwali kagabii, dili moabot sa kwarenta ka libo dinhi kondili sa usa ra ka gatus ug kalim-an, o duha ka gatus, tulo ka gatus ka tawo sa imong gamay nga tabernakulo.”

¹⁸ Mitubag ko, “Sir, sa unom ka bulan gikan karon, kon si Jesus malangan pa, ang tibuok kalibutan makadungog niini.” Kita n’yo?

Tungod kining mga teyp mokaylap sa tibuok kalibutan, kita n’yo, sa tibuok palibot. Ug, busa, nagatudlo lamang kami dinhi karon sumala sa among gitooan ingon nga Kamatuoran, ug among nasayran nga ang Dios nagpamatuod niini kanamo ingon nga mao ang Kamatuoran.

¹⁹ Karon, ang katuyoan, unsa ang—unsang katuyoan sa Dios sa pagpadala sa Balaang Espiritu? Karon, markahan ko kana, ang Juan 14, sugod sa ika-14 nga bersekulo, ug ang pagbasa sa tibuok nga kapitulo, alang sa basehan. Atong makita dinhi, ang katuyoan sa Dios, sa pagpadala sa Balaang Espiritu, ang usa ka katuyoan, maoy aron nga ang Dios Mismo mahimong mopuyo sa Iyang Iglesia ug maipadayon ang Iyang mga plano pinaagi sa Iglesia.

Maingon nga, ang Dios diha kang Cristo, ginapadayon ang Iyang mga plano pinaagi kang Cristo; gikan kang Cristo, ngadto sa Iglesia, nga ginapadayon ang Iyang buluhaton pinaagi sa Iglesia.

²⁰ Karon, nahibaloan na nato kung unsa ang Balaang Espiritu. Atong nasayran kana, kagabii, nga Kini mao ang Dios.

Karon, kon atong hunahunaon ang Dios, ang Amahan, sama sa gisulti ni Jesus dinhi, ang Iyang Amahan; Ang Dios, ang Anak, ingon nga si Jesus; Ang Dios, ang Balaang Espiritu, sumala sa tawag nato Niini karon, bueno, wala kana nagapasabot nga adunay tulo ka indibiduwal, ug lahi-lahi nga mga Dios. Apan kini nagapasabot nga adunay usa ka Dios sa tulo ka mga opisina.

Isaysay nato kini nga ingon niini. Ang tanan sa kung unsa ang Dios, gibubo Niya ngadto kang Cristo, tungod kay Iyang gihaw-as ang Iyang kaugalingon ug gibubo Kini ngadto kang Cristo. “Ug si Cristo mao ang kahupnganan sa pagka-Dios diha sa pagkalawas.” Ang tanan sa kung unsa si Jehovah, gibubo Niya ngadto kang Cristo.

Ug ang tanan sa kung unsa si Cristo, gibubo Niya sa Iglesia; dili ngadto sa usa ka indibiduwal, kondili ngadto sa kinatibuk-ang Lawas. Diha, diin kita nagatigum sa panaghiusa, kita

adunay Gahum. Ang tanan kung unsa ang Dios, anaa kang Cristo; ug ang tanan kung unsa si Cristo, anaa kaninyo.

“Kay ang Dios nahimong unod, ug nagpuyo uban kanato.” 1 Timoteo 3:16, kon imo kining ginasulat, “Sa walay lantugi daku ang tinago sa pagka-diosnon: kay ang Dios gipadayag diha sa unod, ug amo Siyang nahikap. Ang Diyos, si Jehova, nahimong unod, ug naglakaw dinhi sa yuta, ug nakita namo Siya sa among mga mata.”

²¹ Kabalo mo, sa mao ra nga kapitulo, sa Juan 14, si Felipe miingon, “Ginoo, ipakita kanamo ang Amahan, ug kana igo na alang kanamo.”

²² Si Jesus miingon, “Dugay na Ako nakig-uban kanimo, Felipe, ug wala ka makaila Kanako? Sa diha nga kamo nakakita Kanako, kamo nakakita sa Amahan. Ug nganong ginaingon mo Kanako, ‘Ipakita kanamo ang Amahan?’” Ang Dios nahimong unod.

²³ Karon ingon niini kini. Ang Amahan mao ang Dios sa ibabaw nimo, sumala sa atong ginaingon. Sukad pa kay Adan. Ang Dios, ang Amahan, atua sa ibabaw ni Moises ug sa mga anak sa Israel, ingon nga usa ka Haligi nga Kalayo. Dayon, ang Dios uban kanato, diha kang Cristo; milakaw uban kanato, nakigsulti kanato, nangaon uban kanato, natulog uban kanato. Ang Dios ibabaw kanato; ang Dios uban kanato; ug karon ang Dios nga ania kanato. Ang tanan kung unsa ang Dios, misulod kang Cristo; ug ang tanan kung unsa si Cristo, misulod sa Iglesia.

Unsa man Kini? Kini mao ang Dios nga nagapamuhat diha kanimo. Bisan asang dapita sa kalibutan pag gusto Niyang tawagon ka, dinha mismo kanimo, nagapamuhat Siya alang sa paghimo sa Iyang maayong kabubut-on. Daku kaayo ang angay natong ipasalamat sa Dios tungod niini! Ang Dios, ang Balaang Espiritu, gipadala alang sa katuyoan nga ang Dios magapuyo diha sa Iyang Iglesia, nga nagalihok sa matag kapanahonan, nga ginabuhat ang Iyang Balaanong kabubut-on.

²⁴ Kung ang tawo nagbiaybiay kanimo, wala sila nagbiaybiay kanimo, apan gibiybiay nila Siya nga nagpadala kanimo. Busa si Jesus miingon, “Bulahan kamo sa dihang pagasultihan kamo sa tanang klase sa mga daotang butang batok kaninyo, nga bakak, tungod sa Akong Ngalan. Bulahan kamo.” Ug, kini usab, “Ang tanan nga mga mahagugma magkinabuhi sa pagka-diosnon diha kang Cristo Jesus magaantus sa paglutos.”

Tungod, sa dihang gipahayag sa Dios ang Iyang Kaugalingon diha kang Cristo, sila nagdumot Kaniya. Pero kinsa ang nagdumot Kaniya, sa hilabihan? Ang iglesia. Ang iglesia nagdumot Kaniya, sa hilabihan. Gidumtan nila Siya nga mas labaw pa kaysa—sa palahubog. Grabe ang ilang pagdumot Kaniya nga mas labaw pa kay sa ubang mga tawo. Ang iglesia kadtong nagdumot gyud Kaniya. Ug, busa, kung makita nimo

ang *kosmos*, “Ang sistema sa kalibutan, ang kalibutan wala makaila Kaniya,” nagapasabot, “ang iglesia,” nga sa ngalan ra, “wala makaila Kaniya. Sa mga Iya mianhi Siya, ug ang mga Iya wala modawat kaniya.”

“Apan sa tanan nga nanagdawat Kaniya, kanila naghatag Siya sa katungod sa pagkahimong mga anak sa Dios, kanila nga nanagtoo sa Iyang Ngalan.” Oh, daw sa unta nato angay’ng higugmaon Siya ug simbahan Siya! Ang katuyoan sa Diyos, mao ang pagtinguha nga magkaaduna og pagpakig-fellowship!

²⁵ Sama sa, sa dili pa nato biyaan kana nga teksto, iaplikar nato kini; sa kaniadtong mga adlaw ni Ruth, adunay balaod sa pagtubos, sa dihang si Naomi mibiya sa nasud, tungod sa pagsulay, ug kalisdanan. Miadto siya sa yuta sa mga Moabitanhon, nga mga dagaang, ug nominal nga mga Cristohanon. Tungod, ang mga Moabitanhon gikan man sa anak nga babaye ni Lot, ug sila’y sa ngalan ra nga mga magtotoo, ug mga tawong nakiglambigit sa uban. Ug sa dihang namatay ang bana ni Naomi, ug namatay ang iyang duha ka anak nga lalaki. Ug sa dihang mopauli na, si Naomi. . . Si Ruth ug Naomi, sa dihang mopauli na, siya. . . Ang usa sa iyang mga umagad nga babaye, si Orpa, miingon kini nga mobalik kono siya sa iyang nasud, sa iyang mga diyos-diyos, ug sa iyang iglesia, ug sa iyang mga kabanay. Ug si Naomi misulay sa pagpabalik sàb kang Ruth, apan si Ruth miingon, “Ang imong katawhan mao ang akong katawhan. Ang imong Dios mao ang akong Dios. Kung asa ka mamatay, didto usab ako mamatay. Kung asa ka ilubong, didto usab ako ilubong. Ug dili gyud ko mobalik.”

²⁶ Ingon niana kung ang usa ka tawo nakabaton og tin-aw nga pagsabot. Dili niya igsapayan bisan unsa pa’y gisulti sa iyang katawhan, “Pagmoadto ka didto mamahimo ka lang og usa ka holy-roller o unsa man.” Wala kana para kang Ruth. Tungod adunay katuyoan ang Dios nga kinahanglan matuman.

²⁷ Ug sa ingon ka sigurado nga ikaw gigutom karong gabhiona alang sa Balaang Espiritu, usa kini ka butang sa sulod nimo, nga nagabira kanimo, aron nga ang katuyoan sa Dios sa imong kinabuhi kinahanglang matuman, sama sa kung unsa kini kaniadto kang Ruth.

²⁸ Pagkamaanindot gayud sa maong estorya! Dili ko kabiya niini, bisan sa makadiyut lang. Nahibalo na mo sa balaod sa pagtubos, nga sa dihang si Boaz. . . Nahibalo na mo sa estorya kung unsa nga si Ruth nanghagdaw sa uma ug nakakaplag ug kahimuut ni Boaz. Ug sa dili pa mahimo ni Boaz nga minyoan si Ruth, kinahanglan usà niyang tubuson ang tanan nga nawala kay Noemi. Ug ang usa lamang nga makatubos sa nawala nga katigayunan ni Noemi, sumala sa balaod sa pagtubos, mao ang usa ka duol nga kadugo nga lalaki; kinahanglan nga usa ka

kabanay aron siya makatubos. Ug kana kinahanglan labing duol nga kabanay. Ug kinahanglan nga maghimo siya og usa ka pang-publikong ilhanan, didto sa gawas sa ganghaan, o usa ka pamahayag sa publiko nga iya nang gitubos ang tanan nga nawala ni Noemi. Ug gibuhat kadto ni Boaz pinaagi sa pagtangtang sa iyang sapin sa atubangan sa mga anciano, ug miingon, “Kung adunay bisan kinsa dinhi nga adunay bisan unsang butang nga iya ni Noemi, gitubos ko na kini karong adlaw.”

²⁹ Ug ingon niana ang gibuhat sa Dios, gisunod ang Iyang Kaugalingong mga balaod. Ang Dios dili ingon niana nga, maghatag kanimo ug usa ka balaod nga sundon ug Siya mosunod sa lain. Siya nagasunod sa Iyang Kaugalingong mga balaod. Busa, ang Dios, aron matubos ang nahisalaag nga iglesia, ang nahisalaag nga kalibutan, og ang nahisalaag nga kabuhatan; Ang Dios, nga Siya walay kinutuban sa Espiritu, aron matubos ang nawala nga kaliwatan sa tawo, ang Dios Mismo nahimong kabanay, nahimong usa ka Tawo, usa ka Anak nga Iyang gibuhat sulod sa tagoangkan ni Maria. Ug dayon Siya naghimo og usa ka timailhan, o usa ka pagpamatuod; didto sa gawas sa mga ganghaan sa Jerusalem, Siya gibayaw tali sa langit ug sa yuta, ug namatay, ug gitubos Niya ang tanan-tanan. Ug pinaagi sa pag-ula og dugo, gibalaan Niya ang Iglesia aron mahimo Niyang puyan, ug makig-fellowship ug makigsulti, aron mahibalik kadtong nawala nga pagpakig-fellowship gikan sa tanaman sa Eden diin ang Dios mikunsad matag gabii, sa panahon sa pagsimba.

Namatikdan ba ninyo? Ang Dios mikunsad sa kabugnaw sa adlaw, sa pagsalop sa adlaw. Aduna gyuy usa ka butang sa dihang magsugod na ang kagabhion, mahunahuna sa mga tawo ang iglesia ug ang Dios; kanang mga Cristohanon. Sa dihang makita mo ang pagsalop sa adlaw, maamgo mo nga ang imong adlaw nagasalop usab.

³⁰ Ug sa kabugnaw sa kagabhion monaog Siya ug makigsulti kanila. Ug nawala sa Iya ang maong pagpakig-fellowship, tungod sa sala mao nga dili na Niya mahimo kini.

Ug dayon nahimo Siyang unod ug nagpuyo uban kanato, aron nga Siya makabalik pag-usab sa tawo, ug magapuyo diha sa tawo, ug ibalik ang tawo ngadto sa usa ka pagpakig-uban Kaniya pag-usab, ug iuli kaniya ang iyang hinatag-sa-Dios nga katungod. Ingon niana ang gibuhat sa Dios.

³¹ Mao kana ang katuyoan sa Espiritu Santo. Ang Amahan kini, pag-usab, ang Dios Amahan nga nagapuyo diha kanimo, nga ginapahigayon ang Iyang mga plano, aron humanon ang Iyang plano sa pagtubos; nagapamuhat pinaagi kanimo, nga ginahimo kang usa ka masigka-magbubuhay uban Kaniya; nga ginahatagan ka og katungdanan, ginahatagan ka og bahin alang sa imong nahulog, ug nawala nga igsoong lalaki ug babaye; nga

ginahatag kanimo ang Iyang Espiritu ug ang Iyang gugma, aron pangitaon ang mga nawala, sama sa gibuhat sa Dios kaniadto sa tanaman sa Eden. “Adan, Adan, hain ka man?” Ingon niana ang ginabuhat sa Balaang Espiritu ngadto sa usa ka lalaki o usa ka babaye. Nga sa dihang Kini modangat sa ilang kasingkasing ug Kini mopuyo na dinha, aduna na siya’y kauhaw ug kagutom alang sa nahisalaag nga mga kalag.

Mao kana ang nagakahitabo sa mga panagtigum karon. Wala na kini og igong paghikap-sa-Espiritu, aron magsangyaw ngadto sa mga kalag nga nawala ug sa mga naghimalasyon. Mas ang tuyo maoy paghimo og ngalan, o simbahan, o bilding, o denominasyon, imbes og programa alang sa pagdaog og mga kalag. Pagkamakaluluoy! Mahimo natong hisgotan kini og dugay.

Gibubo sa Dios ang Iyang Kaugalingon ngadto kang Cristo. Eksakto.

³² Gibubo ni Cristo ang Iyang Kaugalingon ngadto sa Iglesia. Busa, karon matikdi, “Nianang adlaw masayod kamo nga Ako anaa sa Amahan, ug kamo ania Kanako, ug Ako anaa kaninyo. Nianang adlaw mahibaloan ninyo kini.” Kay, kini, ang kinatibuk-an niini maoy usa ka plano mahitungod sa pagtubos nga nagakatuman na, nga ang Dios nagabalik aron mopuyo, ug makig-uban, ug makig-fellowship sa Iyang katawhan, sama sa Iyang gibuhat kaniadto sa sinugdanan.

Karon, sa dihang, mapahimutang na Niya ang Iyang Iglesia sa kahimtang kon diin mahimo na mosulti, nga ang Iyang Iglesia anaa na sa kahimtang kon diin mahimo na Siyang modagayday Niini, ug aduna na’y gugma, pagkabig, ug pagpakig-fellowship, nan moabot na ang usa ka Eden. Iyang dad-on ang Iyang Iglesia pabalik kon diin Kini—Kini mibiya Kaniya, balik ngadto sa pagka-Eden pag-usab, diin didto Kini nahulog. Kini, karon . . . Didto Kini nakahimo sa Iyang unang pagsugod, o pagkahulog. Didto usab Kini dad-on pabalik, nga limpyo na usab ang talaan sa katubsanan, nga ginadala sila pabalik ngadto sa maong dapit pag-usab.

³³ Madugay-dugay na nga panahon nga ang Iglesia ania sa kalibutan. Ug ang Iglesia, sa tinuod, ang Repormasyon, human sa kinse ka gatus ka tuig sa mangitngit nga kapanahonan . . . Si Luther mao ang unang repormador nga mitungha human sa ubay-ubay nga mga apostoles. Ug dayon sa dihang miabot si Luther, Nagbubo ang Dios og gamay nga bahin sa Espiritu ug gibubo Kini ibabaw sa Iglesia, sa pagpamatarung. Ug dayon sa mga adlaw ni Wesley, Siya nagbubo og dugang pa sa Iyang Kaugalingon, ngadto sa pagpabalaan. Ug samtang ang kapanahonan nagapadayon, paingon sa katapusan nga panahon, ginapuno sa Dios ang Iyang Iglesia. Susiha lang ang palibot ug hibaloa kung kana ba’y Kamatuoran, o dili.

³⁴ Tan-awa ang kapanahonang Lutheran, kamong nagabasa sa kasaysayan, tan-awa ang ilang rebaybal ug kung unsa ang ilang gipamuhat. Tan-awa kung unsa ka mas gamhanan ang rebaybal ni Wesley, kung unsa ka mas daghang gahum ang ilang nabatonan, apan ngadto lang sa minoriya. Matikdi kadtong mga adlaw sa Pentecostes, pagkadakung rebaybal ang napahigayon nila kaniadto, grabe ka daku, ug grabe ka halapad ang pagkaylap.

³⁵ Gani, ang *Our Sunday Visitor*, ang mantalaang Katoliko, nagsugid nga ang mga Pentecostal kono nakapahigayon og usa ka milyon ug lima ka gatus ka libo nga mga pagkabig sulod sa usa lang ka tuig, gilabwan ang tanang uban pang mga iglesia. Ang Katoliko kono nakakabig, ug nag-angkon, og usa ra ka milyon. Diha sa ilang mismong *Sunday Visitor*, ang mantalaan nga gitawag og *Sunday Visitor*, naghatag ug pahayag nga nalabwan na sila sa mga Pentecostal.

Ug, hinumdumi, ang Pentecostal nga mga pagkabig maoy mga pagkabig nga puno sa Espiritu Santo. Minoriya lang, sa sugod, didto sa kilid sa eskinita, nga gamit ang usa—usa ra ka karaan nga gitara. Ug ang mga babaye dili gani makapalit og usa ka parisan sa medyas. Manghigda didto duol sa mga riles sa tren, mang-ani og mais ug masahon kini, aron himoong tinapay alang sa ilang mga anak. Apan unsa man ang nadangatan niini? Nahimo na kining labing gamhanan nga iglesia nga nagabarog sa kalibutan karon, dili diha sa mga mata sa kalibutan, kondili sa mga mata sa Dios, tungod kay gipamatud-an Niya kini pinaagi sa Iyang mga ginabuhat alang kanila. Iyang ginabubo ang Iyang Kaugalingon ngadto kanila, ginabubo mismi Kini.

³⁶ Matikdi karon kung unsa ang nahitabo, ginabubo sa Dios ang Iyang Kaugalingon ngadto kanila. Karon ang Iglesia anaa na sa usa ka kahimtang, gikan kang Luther, Wesley, ug nagpadayon ang rebaybal ngadto sa mga Pentecostal; ug karon nagapasulod na niining kapanahonan kon diin ania kita karon, pinaagi sa mao ra nga Balaang Espiritu, apan mas daghan lang Niini. Karon, sa dihang giluwes silang mga Lutheran kaniadto, nakadawat sila og bahin sa Balaang Espiritu. Sa dihang gibalaan ang mga Methodist, buhat kadto sa Balaang Espiritu. Kita n'yo, usa ka bahin kadto sa Balaang Espiritu. “Kung sila lang nga wala kita dili sila mahimong hingpit,” nagaingon ang Kasulatan. Kita n'yo?

³⁷ Karon, ang Dios, sa diha nga ang Kahayag nagsugod na sa pagdan-ag sa katapusang mga adlaw, Siya nagapaabot kanato, og usa ka dakung butang gikan kanato. Tungod, “Ang gikahatagan og daku, daku pud ang ginapaabot gikan kaniya.” Busa mas daku pud ang pagapaaboton Niya gikan kanato kaysa gipaabot Niya gikan sa mga Lutheran o mga Methodist kaniadto, tungod kay nagalakaw man kita diha sa usa ka mas labaw nga

Kahayag, mas labaw nga Gahum, mas labaw pa...usa ka—usa ka mas labaw nga kapanghimatuoran kay sa ila. Karon, aduna kita’y mas dakung kapanghimatuoran mahitungod sa pagkabanhaw. Kita adunay mga butang nga mas lig-on, mas sigurado kaysa kanila kaniadto.

³⁸ Apan sama ra sa akong giingon sa usa ka Lutheran nga kolehiyo, dili pa lang dugay.

Miingon sila, “Unsa ma’y anaa kanamo?”

Miingon ko, “Ang usa ka tawo nagtanum og umahan sa mais. Pagtungha sa unang gagmay’ng mga dahon, ug ang tawo miingon, ‘Salamat sa Ginoo alang sa usa—usa ka tanum nga mais!’ Sa potensyal, aduna na siya niini, apan ang anaa kaniya kadto pa lang sinugdang porma. Wala magdugay, nahimo kining usa ka lindog.”

Ug migula ang uhay gikan niini, nga mao ang mga Methodist.

³⁹ Kung inyong hingmatikdan ang kinaiyahan, inyong makita ang Dios nga nagapamuhat. Anaa dinha ang tinago nga nagaduyog usab bisan sa akong ministerio. Kita n’yo? Nga, sa pagtan-aw lang sa kinaiyahan, makita nato kung sa unsang paagi kini nagapamuhat, kung unsang panahon na ug kung unsang takna na, makita ninyo kung asa na kamo nagakinabuhi. Bantayi ang kapanahonan.

⁴⁰ Ug, karon, ang mga Methodist, sila ang mga uhay. Pagtan-aw nila balik sa mga Lutheran, miingon, “Nabatonan namo ang pagpabalaan; wala kamo’y ingon Niini.”

Pagkataudtaud, gikan sa polen, gikan sa Methodist, migawas ang lugas sa...usa ka pakaw sa mais. Kadto mao ang Pentecostal.

Mao kana, pagpamatarung, nga unang hugna Niini. Pagpabalaan, ang sunod nga hugna Niini. Balaang Espiritu, ang sunod usab nga hugna Niini; nga mao ang Pentecostal. Luther, Wesley, Pentecostal.

⁴¹ Karon unsa man ang Pentecostal? Gipahisama ko kini, tungod kay, sa Pentecostal, gibalik niini, dili usa ka lunhaw nga dahon, dili usa ka uhay, apan...

Dili mahimong isulti sa lugas ngadto sa uhay, “Wala ka’y kapuslanan nako.” O, ang uhay dili makasulti sa—sa dahon, “Dili ka mapuslanon kanako,” tungod ang mao ra nga kinabuhi nga anaa sa dahon maoy nagpahimo sa uhay. Ang mao ra nga kinabuhi diha sa uhay maoy naghimo sa pakaw.

Ug ang iglesiang Lutheran ang nagpahinungdan sa iglesiang Wesley. Ang iglesiang Wesley usab ang nagpahinungdan sa Pentecostal.

Apan, ang Pentecostal, unsa man kini? Kini usa ka pagpanag-uli sa mao ra nga klase nga lugas nga nalubong

kaniadto sa yuta sa sinugdanan, nga ginapahiuli ang tanang kahupnganan sa Gahum sa Pentecostes, pinaagi sa bautismo sa Espiritu Santo, kita n'yo, sa katapusang mga adlaw. Oh, pagkahalangdon kini nga butang, ang mausisa, toohan ug makita.

⁴² Karon sa niining kapanahonan kon diin kita karon nagakinabuhi, niining kapanahonan, lapas na kini sa Pentecostal.

Ang Pentecostal mipahiluna na sa iyang kaugalingon ngadto sa mga organisasyon, ug nagsugod na gayud sa pag-awat-awat sa mga organisasyon, "*Ingon niini* kami ug *ingon niana* kami." Kinaiyahan kana. Dili nimo kana mapugngan. Tungod kinaiyahan kana. Buhaton gyud nila kana. Anaa na sa plano, alang kanila nga buhaton kana.

Apan ang Iglesia nagpadayon. Kini nahimong mas dako, ug mas gamhanan. Kini ang pagpahiuli sa mga gasa.

Ug daghang mga tawong Pentecostal ang wala na nagatoo sa Balaanong pagpang-ayo, sa ministerio sa mga Manolunda, ug sa mga gahum sa Dios. Daghang mga Pentecostal ang nagatawag niining mga panan-awon nga akong makita, "demonyo kono." Daghang mga organisasyon ang dili gani gustong makighilambigit Niini, diha sa mga Pentecostal. Kita n'yo, mipadayon na kita lapas niana. Ingon nga gitawag kaniadto sa mga Methodist ang Pentecostal og, "buang," tungod sa pagsulti sa laing mga dila. Maingon nga gitawag kaniadto sa Lutheran ang mga Methodist, "buang," tungod sa pagsinggit-singgit. Kita n'yo?

Apan kining tanan usa lamang ka pag-irog pa sa unahan sa Balaang Espiritu, hangtud nga ang halangdong Iglesia pagapun-on, ug mag-awas-awas sa kapuno, alleluyah, sa dakung mga gahum sa Dios nga Makagagahum-sa-tanan. Hangtud, miabot na kini sa usa ka kahimtang nga ang mismong mga buhat nga gihimo ni Jesus kaniadto maipadayag na mismo diha sa Iglesia karon. Haduol na kaayo kita, mga higala.

⁴³ Tugoti ako nga mohunong dinhi, sa makadiyut lang, aron atoa gyud makuha kon unsa gayud ang katuyoan nganong gibutang sa Dios ang Espiritu Santo sa Iglesia, ug hatagan kamo og usa pa ka tipo aron inyong mahibaloan. Sa Daang Tugon kaniadto, sa dihang ang—ang anak. . .

Pag ang usa ka lalaki kaniadto magtukod og kaugalingon niyang panimalay. Kinahanglan aduna siya'y pangasaw-onon, kana ang unang butang.

Dayon nahimo siyang bantugang tawo, sama sa usa ka organisasyon. Maayo kana.

Ang sunod nga mahitabo, dihay natawo sa maong panimalay. Dinhang panahon nga ang Balaang Espiritu, kita n'yo, usa pa ka

espiritu ang misulod, nga usa ka anak nga lalaki. Kana nga anak, dili pa siya mahatagan og bug-os nga pagdumala, ni mahimong manununod hangtud nga moabot siya sa usa ka pihong edad. Ug kinahanglan siyang mapamatud-an, usà. Oo.

Ug aduna sila kaniadto og balaod sa pagsagop. Sa inyo nga mga ministro, “ang pagpalingkod sa posisyon ngadto sa usa ka anak,” mao ang akong ginahisgotan karon, kita n’yo, dayon sa dihang anaa na siya sa punto nga mahimo na siyang isagop. Si Jesus naghatag ug maanindot nga paghulagway mahitungod niini, didto sa Bukid sa Pagkausab.

⁴⁴ Sama sa ako nang giingon, ang Dios dili gayud molapas sa iyang mga balaod sa pagbuhat og bisan unsa.

Kung aduna ka’y tuboran *niining* usa ka bungtod, nga nagapabugwak og tubig, ug sa niining laing bungtod *dinhi*, aduna ka’y pananum nga halos malaya na, mahimo kang motindog niining bungtod ug mosinggit, “Oh, tubig, pagbugwak ka dinhi ug luwasa ang akong pananum! Oh, tubig, ari diri sa akong mga pananum!” Dili gayud kini mahimo. Apan kung ikaw mobuhat sumala sa mga balaod sa grabitasyon, mahimo nimong tubigan kanang mga pananum.

⁴⁵ Kung aduna mo’y masakiton nga tawo nga naghigda dinhi, o makasasala nga naghigda dinhi, o tawo nga gustong maitulid, apan dili makahunong sa pag-inom, dili makahunong sa pagpanigarilyo, dili mapugngan ang kaulag ug ingon-anang mga butang. Kung magasunod lang kamo sa mga balaod sa Dios, tugotan ang Balaang Espiritu nga mosulod dinha, nan dili na siya ang nagpanag-iya sa iyang kaugalingon. Siya, undangon na niya kanang butanga, tungod ang Balaang Espiritu na ang nagadumala kaniya. Apan kinahanglan kamong mamuhat sumala sa mga balaod sa Dios, sa mga lagda sa Dios.

⁴⁶ Karon, sa Daang Tugon, sa dihang nahimugso kining bata, ila kining gina-obsorbahan, aron makita nila kung unsa ang panggawi niini, o pamatasan.

Dayon ang amahan, ingon nga usa ka iladong negosyante nianang panahona, tingali sa edad na nga mga kwarenta o singkwenta, wala siya’y panahon sa pagtudlo niini nga bata, nga siya mismo, maong nagkuha siya. . . Sa ilang mga adlaw kaniadto wala sila’y mga pang-publikong eskwelahan sama karon, maong nagakuha sila’g kadtong ilang gitawag nga “magtutudlo,” o usa ka “tigpadaku,” maestro. Ug kini nga magtutudlo mao ang labing maayo nga iyang makit-an, nga kini magmatinud-anon ug maisulti niini sa amahan ang kamatuoran bahin niining bata.

⁴⁷ Ug unya sa dihang kining bataa miabot na sa usa ka piho nga edad, maingon nga, siya hingkod na. Kung kanang bataa usa ka masupilon, dili maayo, walay pagtagad sa negosyo sa iyang amahan; ang iya lang ginahunahuna mao ang mga pagpangibog

ug pagpakig-relasyon sa mga babaye, o—o pag-inom-inom, o pagsugal, o mga paglumba sa kabayo; kanang bataa magpabilin gihapon nga anak, apan dili gayud siya maibutang sa posisyon nga mamahimong manununod sa tanang panag-iya sa iyang amahan.

Apan kung siya usa ka buotan nga bata, ug aduna siya'y pagtagad sa negosyo sa iyang amahan, ug siya'y napamatud-an nga maayo nga bata, nan aduna sila'y himoong seremonya. Ilang dalhon ang maong bata ngadto sa dalan ug sul-oban siya'g puti nga kupo, ug ila siyang palingkuron sa usa ka entablado aron ang tibuok siyudad makasaksi. Magpahigayon sila og usa ka kombira ug usa ka jubileo, ug dayon ang amahan maghimo'g seremonyas sa pagsagop. Iyang ginasagop ang iyang kaugalingong anak ngadto sa iyang kaugalingong negosyo, ug dayon ang maong anak mamahimo nang sama sa iyang amahan. Sa laing pagkasulti, kung sa atong panahon karon, ang pirma sa anak diha sa tseke ingon ra ka valido sama sa pirma sa amahan.

⁴⁸ Karon tan-awa kung unsa ang gibuhad sa Dios. Sa dihang nahimugso ang Iyang Anak, Iya usa Siyang giandam sulod sa katloan ka tuig, pinaagi sa pagsulay Kaniya, ug pagpamatuod Kaniya. Dayon gihatagan Niya Siya og tulo ka tuig nga malisud nga pagsulay. Ug unya pagkahuman sa malisud nga pagsulay, sa diha nga Iyang nakita nga ang Iyang Anak nagapamuhat sa mga buluhaton nga iya sa Amahan; didto sa Bukid sa Pagkausab, diha sa Basahon ni Lucas; gidala ni Jesus si Pedro, si Santiago, ug si Juan, ang tulo ka saksi, ug mitungas sila paingon sa kinaibabwan sa bukid, ug didto gituman sa Dios ang mga balaod sa pagsagop. Siya . . . Mihangad sila ug nakita nila si Jesus, ug ang Iyang mga bisti midan-ag sama sa kilat. Ug samtang usa ka Panganod ang nagpaibabaw Kaniya, ug adunay Tingog nga migawas gikan sa Panganod, ug nag-ingon, “Mao Kini ang Akong pinalangga nga Anak; Kaniya magpatalinghug kamo. Magalingkod na lamang Ako karon ug wala na'y ikasulti pa. Ang Iyang igapamulong maoy balaod ug Kamatuoran.”

⁴⁹ Apan karon ang iglesia nahuman na niadtong mga eskwelahan. Naminyo na siya, kaniadto pa, ug nahimo nang usa ka denominasyon, usa ka organisasyon. Apan, kung inyong namatikdan, ang maong Pagkahimugso nagdala og lain nga resulta. Ug karon anaa na kini sa punto kon diin ang iglesiang Pentecostal, uban sa bag-ong Pagkahimugso, gisulayan ug gipamatud-an, ug karon nagapaingon na kini sa kahimtang nga . . . Ang Dios wala nagapakiglambigit sa Iglesia ingon nga usa ka organisasyon. Wala siya nagapakiglambigit sa Iglesia isip usa—usa ka grupo sa mga tawo.

Siya nagapakiglambigit sa Iglesia isip usa ka indibiduwal, sa matag indibiduwal sa sulod sa Iglesia. Ug miabot na kini sa takna. . . Ug dili kini gililong; ato kining tanan makita. Sa

dihang ginapamatud-an ang usa ka tawo, ug gihigugma siya sa Dios, Iya siyang dad-on ngadto sa usa ka dapit sa Iyang kaugalingon. Didto sa atubangan sa mga Manolunda adunay Siya'y ginabuhat alang kaniya. Iya siyang ginabayaw didto sa Presensiya sa Dios, ug gigasahan siya, ug ginapuno siya, ug ginapadala siya. Mao kana ang kapanahonan nga atong gikinabuhian.

⁵⁰ Ang mao rang Espiritu Santo nga nagluwas sa mga Lutheran, nga nagpabalaan sa mga Methodist, nga nagbautismo sa mga Pentecostal, nag-andam na karon sa Pagbalik ni Ginoong Jesus. Sa dihang, kini mamahimo nang gamhanan kaayo, kana nga Lawas, mosulod niining Grupo, nga usa ka Iglesia, nga magpabangon sa tanang uban gikan sa lubnganan. Magkaaduna na'y pagkabanhaw. Alang niana ang Espiritu Santo. Unsa ang Espiritu Santo? “Kung wala kita dili sila mamahingpit.” Nabuhi sila kaniadtong usa ka adlaw, ilalum niana. Kita nagakinabuhi pud sa laing adlaw.

“Tungod kay pagmoabot ang kaaway ingon nga nagabaha nga suba, Ako...ang Espiritu sa Dios mopataas og usa ka sumbanan batok niini.” Kita n'yo? Anaa na kita niining adlaw karon...

⁵¹ Kaniadto, sa wala pa sa katunga ang ilang kaalam sama karon. Dili pa sila makahimo og atomic bomb o usa ka sakyanan. Wala pa sila'y siyensiya ug ingon-anang mga butang nga sama kanato karon, bisan niining, mysteryosong mga butang; sama sa pag-ingon nga ang tao, giumol tungod sa kung unsa nga pagbuto gikan sa abog ug uban pa, ug nagahimo'g pipila ka mga pagtuki ug naninguha pang pamatud-an kini, aron mahimong dili-magtotoo ang mga tawo.

Apan karon, ingon nga gikinahanglan nato Kini, ang Espiritu sa Dios nagpataas og usa ka sumbanan. Unsa man kini? Siya nagabubo sa Iyang Espiritu. Dayon, kadtong mga nagapahulay didto sa lubnganan, o ilalum sa halaran sa Dios, sumala sa giingon sa Kasulatan, sila'y nagasinggit, “Unsa pa ka dugay, Ginoo? Unsa ka dugay? Unsa pa ka dugay?” Ang Dios nagahulat pa alang kanako ug kanimo. Ang Iglesia nagahulat pa kanako ug kanimo. Alang sa panahon sa pagsagop, diin mahimo nang ibubo sa Dios ang Iyang kahupnganan, ang Iyang Gahum, Iyang pagkabanhaw, nga diin ang Iglesia ug si Cristo nahimo nang magkapareho na gayud hangtud nga si Cristo makita na sa taliwala nato, ug ginabanhaw ang mga patay, ug kita mopaingon na sa Pagsakgaw.

⁵² Karon atong ingnon, ipakita taudtaod, nga kadto lamang mga napuno sa Espiritu Santo ang maapil nianang Pagsakgaw. “Kay ang tanang uban pa sa mga nangamatay dili mabuhi hangtud mahuman ang usa ka libo ka tuig.” Husto kana. Kadto

lamang mga tawo nga puno sa Espiritu Santo ang makaadto sa Pagsakgaw. Karon, gihatag sa Dios ang Balaang Espiritu. . .

⁵³ Aduna ko'y usa pa ka Kasulatan dinhi, sa Juan 14:12. Kana usa ka pamilyar kaayo nga Kasulatan para sa tanang mga tawo dinhi sa tabernakulo.

Sa pagkamatuod, sa pagkamatuod, nagaingon Ako kaninyo, Ang nagatoo kanako. . .

Karon, ayaw itugot nga kanang pulong nga “nagatoo” magpababag kaninyo. Diha sa-ngalan-lamang nga iglesia, nagaingon sila, “Oo, nagtoo ako. Sigurado, nagatoo gyud ko nga si Jesus Cristo mao ang Anak sa Dios.” Ang yawa nagatoo pud sa mao rang butang. Mao gyud. Ang Biblia nag-ingon niana.

Apan ang Kasulatan nagaingon, diha sa Juan, nga, “Walay tawo ang makatawag kang Jesus nga mao ang Cristo, kondili pinaagi lamang sa Espiritu Santo.” Kamo, sa pagkatinuod, pinaagi sa Kasulatan. . . Tugoti ako nga mohunong dinhi sa makadiyut, sa dili pa ako makahuman sa pagbasa. Dili ka pa kinabig hangtud nga imong nadawat ang Espiritu Santo. Husto kana.

⁵⁴ Ikaw nagatoo lang “ngadto.” Nakigsulti pa lang kanimong Balaang Espiritu, ug dayag nimong gipahayag ang imong pagtoo Kaniya. Gibuhat pud sa yawa ang mao rang butang. “Nagatoo ako nga Siya mao ang Anak sa Dios.” Mao usab ang yawa. Apan ikaw nagalakaw na paingon Kaniya.

Sa diha, nga si Pedro kaniadto gitawag ug gimatarung, pinaagi sa pagtoo kang Ginoong Jesus Cristo; ug diha sa Juan 17:17, gibalaan sila ni Jesus pinaagi sa Pulong, kay ang Pulong mao ang Kamatuoran. Ug Siya mao ang Pulong. Unang, Juan nagaingon, “Sa sinugdan mao ang Pulong, ug ang Pulong kauban sa Dios, ug ang Pulong mao ang Dios. Ug ang Pulong nahimong unod, ug nagpuyo ipon kanato.” Siya mao ang Pulong, maong Iyang gibalaan sila. Miingon si Jesus, “Amahan,” nga nagapakigsulti sa Espiritu diha Kaniya, “Gibalaan Ko sila pinaagi sa Pulong,” Siya Mismo, pinaagi sa pagpandong sa Iyang mga kamot diha kanila. “Ang Imong Pulong mao ang Kamatuoran.” Gilalang Siya pinaagi lamang sa pagsulti, sulod sa tagoangkan sa usa ka babaye; oh, imposible gayud Siya nga mamahimong lahi gawas sa Pulong sa Dios aron maipadayag Siya. “Gibalaan Ko sila.”

⁵⁵ Gihatagan Niya sila og gahum batok sa mahugaw'ng mga espiritu. Ngani nanglakaw sila. Ug Iyang gibutang ang ilang mga ngalan diha sa Libro sa Kinabuhi nga iya sa Cordero. Ug Iyang gipadala sila, Juan. . . sa Mateo 10, ug gihatagan sila og gahum batok sa mahugaw nga mga espiritu; nanghingilin sila og dautang mga espiritu, ug namuhat og mga buhat, ug uban pa. Ug sila namalik, nga malipayon, miingon, “Bisan ang mga yawa nagapasakop kanamo.”

Si Jesus mitubag, “Ayaw pagmaya tungod kay ang mga yawa nagpasakop kaninyo; kondili magkalipay kamo tungod kay ang inyong mga ngalan nasulat sa Libro.” Ug si Judas kauban nila. Tan-awa kung unsa siya ka duol; hangtud mismo sa pagpamatarung, og mipadayon bisan ngadto sa pagpabalaan. Apan diin niya gipakita ang iyang kahayag? Asa niya gipadayag kung unsa gyud siya? Sa wala pa ang Pentecostes, iyang gipakita ang iyang kolor.

⁵⁶ Magbantay mo, kay kana nga espiritu mamahimong ingon gayud ka diosnon ug masantuson kutob sa mahimo nila, hangtud nga pag-abot na sa Espiritu Santo, ug ila Kining likayan. Ingon niana kini nga espiritu (dili ba ninyo kini makita?) nga nagatungha, ang anticristo. Ug si Jesus miingon, “Halos magkapareho na gyud sila, sa katapusang mga adlaw, nga malimbongan niini ang mga Pinili kung arang mahimo.” Apan, hinumdumi, ang Pinili lamang ang makakita niini.

Nagatawag ang Dios pinaagi sa pagpili. Ikaw, wala ka ba malipay nga usa ka nila? Wala ba kamo malipay, kamo nga mga ania karong gabhiona, sa pagkabalo nga adunay usa ka butang sulod sa inyong kasingkasing nga nagapangandoy, “Ginatinguha ko kanang Balaang Espiritu. Gusto ko Ikaw, Ginoo, sa akong kasingkasing”? Tungod kana nga gibutang sa Dios ang imong ngalan diha sa Libro sa Kinabuhi nga iya sa Cordero sa wala pa ang pagkatukod sa kalibutan. Siya miingon niana.

“Walay tawo nga makaduol Kanako,” miingon si Jesus, “gawas kung ipaduol una siya sa Akong Amahan. Ug ang tanan nga nagaduol Kanako, ihatag Ko kanila ang Kinabuhing Walay Katapusan.” Unsa ba ang Kinabuhing Walay Katapusan? Ang Espiritu Santo. “Kinabuhing Walay Katapusan,” kuhaa kana nga pulong ug susiha kini sa Griyego, ug ang ingon dinha, *Zoe*. Ang *Zoe* mao ang Espiritu Santo. “Ang tanan nga gihatag Kanako sa Amahan moduol Kanako. Ug ang tanan nga nagaduol Kanako, ihatag Ko kaniya ang Espiritu Santo, ug pagabanhawon Ko siya sa katapusang adlaw. Akong buhaton kana,” ingon ni Jesus. Wala na’y mga kondisyones mahitungod Niini. “Akong buhaton. Ang tanan nga moduol; ihatag Ko ang Kinabuhing Walay Katapusan.” Siguradong mobangon gyud siya, tungod aduna siya’y Kinabuhing Walay Katapusan. Kinahanglan siyang mabanhaw. Dili siya mahimong mamatay maingon nga ang Dios dili mahimong mamatay.

⁵⁷ Oh, akong minahal nga mga higala sa tibuok nasud ug sa niining gamay nga siyudad, kung mahimo ko lang unta, pinaagi sa akong tawhanong tingog, nga maisulod sa inyong kasingkasing ang kahinungdanon sa pagbaton sa bautismo sa Espiritu Santo, kini ang mamahimong labing nindot nga kapadayagan nga imong maangkon sa imong tibuok kinabuhi.

Ang makita kung unsa . . . Kinahanglan nimo kini buhaton.

Tugoti ko nga klarohon kana, bahin sa, “Dili pa ikaw kinabig.”

⁵⁸ Si Pedro luwas na niadto. Nagatoo siya sa Ginoo, misunod Kaniya. Gisulti ni Jesus kaniya kung kinsa siya, nga kinahanglan siyang mosunod Kaniya. Gihatagan niya siya og gahum batok sa mahugaw’ng mga espiritu ug gibalaan siya. Apan human nianang tanan, ug nahimo pa gani siyang pangulong tigpamaba sa ilang grupo; sama sa gustong itawag niini sa mga Katoliko, “ang obispo sa iglesia, o ang papa,” o unsa man, ang pangulo sa iglesia; bisan pa niana miingon si Jesus, kaniadtong gabii sa pagbudhi Kaniya, “Gihigugma mo ba Ako, Pedro?”

Ug siya mitubag, “Ginoo, nasayod Ka nga gihigugma ko Ikaw.”

miingon si Jesus, “Pakan-a ang Akong mga karnero.” Gisulti Niya kana sa tulo ka higayon.

Ug si Pedro miingon, “Nasayod Ka nga gihigugma ko Ikaw, mouban gyud ako Kanimo hantud sa—sa katapusan, ug ako mouban Kanimo hangtud sa kamatayon,” ug uban pa.

⁵⁹ Miingon si Jesus, “Sa dili pa motuktugaok ang manok sa makatulo ka higayon, ikaw . . . sa dili pa motuktugaok ang manok, ilimod mo Ako sa makatulo ka higayon.” Miingon pa Siya, “Apan, Pedro, giampo Ko na ikaw.” Paminaw mo. Dili pa kana ang tanan. “Giampo Ko na ikaw. Ug human nga ikaw makabig, buhata ang pagpalig-on sa imong kaigsoonan.”

“Human ka makabig.” Siya malagmit nakasinggit na. Ug tingali misayaw na diha sa Espiritu. Siya, siya nakahimo na niining tanang matang sa mga butang, apan wala pa gihapon siya makadawat sa Espiritu Santo. “Human nga ikaw makabig, buhata ang pagpalig-on sa imong kaigsoonan,” tinuod kana, “tumana ang Iyang plano.”

⁶⁰ Karon tugoti ako nga tapuson ang pagbasa sa Juan 14:12. Karon diha sa ika-14 nga kapitulo ug sa ika-12 nga bersekulo, si Jesus miingon, “Sa pagkamatuod, sa pagkamatuod, nagaingon Ako kaninyo, ang nagatoo Kanako . . .” Ug dili ka makatoo . . . “Nagatoo Kanako.” Mahimo kang magtoo *ngadto* Kaniya. Pila ang nakasabot niana? Moingon, “Amen.” [Nagaingon ang kongregasyon, “Amen.”—Ed.]

⁶¹ Nahinumduman ninyo, diha sa Mga Buhat 19. Dili ko gayud gusto ihunong kini dinhi, apan kinahanglan ko lang kining isulti sa diha nga nagaabot kini kanako. Diha sa Mga Buhat sa ika-19 nga kapitulo, sa dihang kining Baptist nga magwawali, nga usa ka—usa ka abogado nga nakabig, ug siya nagawali ug aron maluwas ang mga tawo. Ug sila adunay daku nga kalipay, nagamaya ug nanagsinggit, ug nagapahigayon og panagtigum. Sa Mga Buhat 18, nga atong gihisgotan kini kagabii, si Aquila

ug si Priscila, miadto sila aron magpakigkita niining tawo. Ug hingsayran nila nga siya usa ka bantugan nga tawo, ug siya usa ka magtotoon. Ug iyang ginapamatud-an pinaagi sa Biblia nga si Jesus mao ang Anak sa Dios, nga ang nahibaloan kutob lamang sa bautismo ni Juan. Wala pa siya nasayod mahitungod sa pagbautismo sa Espiritu Santo. Busa miingon siya . . .

Si Aquila ug si Priscila, kadtong magtiayon, nga mga magbubuhay og mga balongbalong; nga, si Pablo usa ka magbubuhay og balongbalong, pud. Ug nadawat nila ang Espiritu Santo ilalum sa pagpanudlo ni Pablo. Miingon siya, “Aduna baya kami og usa ka igsoong lalaki nga moari dinhi. Ipasaysay nato kaniya og gamay ang mahitungod niini.”

Ug sa dihang miadto si Pablo ug nadungog siya nga nagawali, nahibaloan nga siya usa ka hanas nga tawo, og iyang gisulti, “Nadawat n’yo na ba ang Espiritu Santo, sukad kamo nanagpanoo?”

Sila nanag-ingon, “Wala man kami nahibalo kung adunay . . . kon aduna ba’y Espiritu Santo.”

Siya miingon kanila, “Ug sa unsa man diay,” o kung sa Griyego nga pinulongan, “sa unsang paagi diay kamo gibautismohan?”

Sila nanag-ingon, “Nabautismohan na kami ni Juan nga Bautista.”

⁶² Karon matikdi ninyo ang gisulti ni Pablo. Misulti si Pablo, nga, “Sa pagkatinuod gyud nagbautismo si Juan sa paghinulsol; dili alang sa kapasayloan sa mga sala, kondili alang sa paghinulsol, maingon nga mao kana ang inyong gitooan.”

Sa diha nga imong gidawat si Cristo ingon nga imong personal nga Manluluwas, ikaw nagatoo *ngadto* sa bautismo sa Espiritu Santo. Dili pa kana ang bautismo sa Espiritu Santo, akong minahal nga kaigsoonang Baptist. Sayup kana.

Usa ka igsoon miingon kanako sa miaging adlaw, miingon, “Igsoong Branham,” o pipila ka mga panahon na ang milabay, pila na ka bulan ang milabay, miingon siya, “Igsoong Branham, gitooan ni Abraham ang Dios, ug kadto’y giisip kaniya nga pagkamatarung.”

Miingon ko, “Tinuod.”

Miingon, “Unsa pa man ang dugang nga buhaton sa tawo gawas sa pagtoo?”

⁶³ Miingon ko, “Mao ra kana ang mahimong buhaton sa tawo. Mao ra kana ang mahimo niya karon, ang pagtoo sa Dios. Apan gihatagan siya sa Dios og selyo sa sirkunsisyon,” nga maoy atong gihisgotan kagabii, “ingon nga usa ka ilhanan nga gidawat na Niya ang iyang pagtoo ngadto Kaniya.” Ug, niining adlaw, hangtud sa ang Dios . . .

Nagatoo ka Kaniya sa dihang ginadawat nimo Siya ingon nga imong personal nga Manluluwas. Apan sa dihang ginahatag sa Dios sa inyo ang selyo sa Espiritu Santo, kamo giselyohan na Niya sa inyong Eternal nga paingnan. Karon kamong mga Baptist dawata ninyo kana, ug mouyon ako kaninyo bahin sa Eternal nga kasiguradohan. Oo, sir. Tungod, “Ayaw ninyo pagpasub-a ang Balaang Espiritu sa Dios, nga diha kaniya giselyohan kamo alang sa adlaw sa pagtubos.” Wala kamo ginaseyohan pinaagi sa pagtoo *ngadto*, apan ginaseyohan kamo sa Espiritu Santo. Mga Taga-Efeso 4:30, “Ayaw pagpasub-a ang Balaang Espiritu sa Dios, nga diha kaniya giselyohan kamo alang sa adlaw sa pagtubos.” Kana ang nagaseyohan kaninyo, sa dihang kamo nakakaplag og kahamuot sa Dios, ug giselyohan Niya kamo sa Balaang Espiritu.

Mao kana, kay ang Biblia nag-ingon, “Walay tawo ang makatawag kang Jesus nga mao ang Cristo, kondili pinaagi lamang sa Espiritu Santo.”

⁶⁴ Moingon ka, “Nagatoo ako niini kay mao man ang giingon sa pastor.” Husto siya, apan dili kana mahimong ipahinungod kanimo. “Nagatoo ako niini tungod mao man kana ang ginaingon sa Pulong.” Husto kana, apan dili kana mapahinungod alang kanimo, wala kana nagapaapil kanimo.

Ang bugtong paagi nga makaingon ka nga si Jesus mao ang Cristo, maoy sa dihang ang Espiritu Santo nagasulod kanimo ug nagapamatuod, ug Siya Mismo nagasaksi nga, “Siya mao ang Anak sa Dios.” Sa ingon niana ra nga paagi nga mahibaloan mo ang pagkabanhaw, maoy sa dihang ang Espiritu Santo magpamatuod. “Kung Siya ang Espiritu Santo moanhi, Siya magapamatuod Kanako, magapakita kaninyo sa mga butang nga umalabot; igapahinumdom kining mga butanga, nga Akong gisulti, sa inyong mga panumdoman.” Dili ninyo kini makat-onan sa eskwelahan. Kita n’yo? Siya magpahinumdom kaninyo niining mga butanga.

⁶⁵ Ug karon gusto natong basahon pa kining Kasulatan karon, San Juan 14:12.

Sa pagkamatuod, sa pagkamatuod, nagaingon Ako kaninyo, Ang motoo Kanako, magabuhat sa mao usab nga mga buhat nga gibuhat ko; ug labaw pa . . .

Nga, ang hustong paghubad niana maoy “mas daghan,” kung gusto ninyong susihon kini.

. . . ug pagabuhaton niya ang labaw pa niini; kay ako moadto sa akong Amahan.

⁶⁶ Kung moadto Siya sa Amahan, ang Balaang Espiritu moanhi. Husto ba kana? Ang usa pa ka Kasulatan nag-ingon, “Kay kung dili Ako mobiya, ang Maglilipay dili moabot. Apan kung Ako molakaw, Ako magabalik ug magauban kaninyo,

maanaa kaninyo.” Kita n’yo, kini ang Dios nga kauban ninyo. Sa ibabaw ninyo, una; uban kaninyo, diha kang Cristo; anaa kaninyo, diha sa Espiritu Santo. Kini ang Dios nga anaa kaninyo.

⁶⁷ Karon, “Ang mga buhat nga Akong ginabuhat pagabuhaton usab ninyo,” dili lahi nga buhat. Apan gusto sa Dios nga dad-on ang Espiritu Santo, diha kaninyo, aron ipadayon ang samang buhat nga Iyang ginabuhat kaniadto diha kang Cristo.

Ang maong buhat dili pa kaayo kinahanglan sa mga adlaw ni Luther. Iglesia kadto sa Dios. Dili pa kadto . . . Nahimo kining medyo mas kinahanglan niadtong mga adlaw ni Wesley.

Tungod, “Ang kalibutan” ingon sa Biblia, “mahimong mas mahuyang, mas maalamon, ug mas dautan sa paglabay sa panahon.” Kita’y . . . Ang kalibutan nagakahimong mas dautan sa tanang . . . Nasayod kita niana. Aba, ang tawo sa karong panahon nagabuhat og mga butang nga, usa ka gatus ka tuig kaniadto dili nimo mahunahuna nga magkaadunay tawo nga mamahimong ingon niana ka mapintas. “Mamahimong mas dautan pa sa paglabay sa panahon, ug ang mga dautan mamahimong labi pang dautan, sa paglabay sa panahon,” nag-ingon ang Kasulatan, “modaghan ug modaghan pa.”

⁶⁸ Busa, ang Balaang Espiritu nagasige’g padayon. Medyo gamay pa nga gininhawa Niini niadtong panahon ni Luther; nadugangan Kini sa panahon ni Wesley; ug mas lawum nga gininhawa Niini sa panahon sa Pentecostal; ug karon ang maong gininhawa ug ang Espiritu nahimong usa ra. Siya nagakahiusa na, nga ginahatud kanang mao rang makagagahum nga gininhawa sa Espiritu Santo sama sa Iyang gibuhat kaniadto, nga ginapadayag ang mao rang mga buhat nga Iyang gibuhat kaniadto, nga makita kini mismo sa karon, ang mao mismong butang.

⁶⁹ Matikdi ang gisulti ni Jesus: “Sa pagkamatuod, sa pagkamatuod, nagaingon Ako kaninyo, walay mabuhat ang Anak gawas lamang kung unsa ang makita Niya nga ginabuhat sa Amahan. Kung unsa ang ginabuhat sa Amahan, ginapakita Niya sa Anak. Ang Amahan nga nagapuyo Kanako; Siya ang nagabuhat sa maong mga buhat.” Kita n’yo?

⁷⁰ Karon matikdi ninyo, ania ang usa pa ka butang nga gusto nakong isulti dinhi mismo. “Ingon,” Si Jesus miingon, “ingon nga ang Amahan nagpadala Kanako. Ingon,” karon matikdi, “ingon nga ang Amahan nagpadala Kanako, ginapadala Ko usab kamo.” “Ingon nga ang Amahan . . .” Giunsa man Siya nagpadala sa Amahan? Ang Amahan, nga nagpadala Kaniya, mikanaog gikan sa Langit ug mipuyo diha Kaniya.

Miadto Siya. Siya miingon, “Kanunay Kong ginabuhat kung unsa ang makapahimuot sa Akong Amahan.” Kita n’yo? Iyang ginabuhat ang mga butang nga ginapakita sa Amahan nga Iyang pagahimoon. “Wala Ako’y mabuhat gawas kon ipakita usá sa

Akong Amahan.” Ang Dios nga nagpadala Kaniya, anaa sa sulod Niya. “Ingon nga gipadala Ako sa Amahan, sa mao rang paagi nga Ako gipadala sa Amahan, ginapadala Ko usab kamo.” Unsa man Kini? Ang Dios diha kaninyo, nga ginapadayon ang (unsa?) ang mao rang mga buhat, ang samang buhat.

Si Jesus miingon, “Ang . . . siya nga *nagatoo*, siya nga anaa Ako sa sulod niya, ang Espiritu Santo; siya nga *nagatoo*, nga nakasaksi na sa Akong pagkabanhaw, nahibalo nga Ako anaa sa sulod niya. Siya nga ania Kanako; kung kamo nagapabilin Kanako, kung ang Akong mga Pulong nagapabilin kaninyo.”

⁷¹ Karon moingon ka, “Nagapabilin man ako kang Jesus; apan dili gayud ako motoo anang Balaanong pagpang-ayo.” Nagapakita kana nga wala Siya dinha.

⁷² “Nagatoo ako kang Jesus; wala lang ako nagatoo sa Espiritu Santo niining panahona, dili sama nga aduna sila Niini kaniadto.” Nagapakita kana nga wala gyud Siya dinha.

⁷³ Ang Balaang Espiritu magapamatuod sa matag Pulong nga gisulti Niini. Siya dili bakakon. Wala Siya mahadlok kang bisan kinsa o sa bisan unsang organisasyon. Dili Niya kinahanglan malisang tungod kang bisan kinsa. Siya nagapamulong, ug dayon ginabarugan Niya kini.

Kung ang mga mapahitas-on, ug mga kontaminado, ug mga edukado, o ingon sa atong tawag niini, mga plutocrat, kung ayaw nilang dawaton Kini, “Ang Dios makahimo sa pagpatindog og mga anak alang kang Abraham bisan gikan niining mga bato.” Mogamit Siya og mga tulisan, mga tigpayuhut og bino, ug tanang uban pa, ug ipatindog kini. Mahimo kana sa Dios, ug ginabuhat Niya kini. “Ang Dios makahimo sa pagpatindog og mga anak alang kang Abraham bisan gikan niining mga bato.” Aduna gyu’y mobuhat niini, tungod Dios man Siya.

⁷⁴ “Kung kamo nagapabilin Kanako, ug ang Akong mga Pulong anaa kaninyo, managpangayo kamo og bisan unsa nga inyong gitinguha,” tungod nagapangayo kamo sa Iyang Pulong, ug ang Iyang Pulong Kinabuhi. Isulti lamang kini. Kung gisulti kini sa Dios, ug sigurado ka nga gisulti Niya kini, ang Espiritu Santo nagapamatuod nga husto kana nga Pulong, nan, tan-awa, igsoon. Isulti lang kini; ania. “Kung magaingon ka niining bukid, ‘Pahawa,’ ug dili magduhaduha sa imong kasingkasing, kondili toohan nga kung unsa ma’y imong giingon mamatuman.” Dili ikaw ang nagapamulong, apan ang Amahan nga nagapuyo kanimo; Siya gayud ang nagapamulong. Dili ikaw ang nakigsulti nianang bukid, kondili ang Amahan nga anaa kanimo, ang nakigsulti nianang bukid. Nan kinahanglan kining mopahawa. “Ang tanang langit ug yuta mahanaw,” miingon Siya, “apan ang Akong Espiritu dili gayud, o, ang Akong Pulong dili mahanaw.” Sigurado, dili gayud Kini mahanaw. Amahan!

⁷⁵ Karon, “Ang mga buhat nga Akong ginabuhat.” Ang Dios anaa diha sa Iyang Iglesia, aron sa pagpadayon sa Iyang mga buluhaton. Mao nga Iyang gipadala ang Espiritu Santo. Karon, nasayod Siya niana. Siya, nasayod Siya nga dili kini mahitabo, dili kini mahimo sa ingon nianang paagi, gawas lamang niini, busa kinahanglan gayud Niyang magpadala. Gipadala sa Amahan ang Anak, gibutang ang tanan sa . . . Anak nga anaa kaninyo. Ug ang mao rang mga buhat nga Iyang gibuhat, ang mismong mga buhat nga gibuhat ni Jesus kaniadto, inyong pagabuhaton usab, ang Iglesia.

Dili ba ninyo gustong buhaton ang mga buhat sa Dios? Si Jesus miingon, “Kung gusto ninyong buhaton ang mga buhat sa Dios, toohi Ako.” Unsaon ninyo pagtoo Kaniya? Dili ninyo kini mahimo hangtud nga madawat ninyo ang Espiritu Santo.

⁷⁶ Tungod, walay tawong makaingon nga Siya mao ang Anak sa Dios; ginasulti mo lang kung unsa ang gisulti na sa uban. “Ang Biblia nag-ingon nga Siya ang Anak sa Dios; nagatoo ako sa Biblia.” Bueno. “Ang Biblia nagaingon nga Siya ang Anak sa Dios; mitoo ko sa Biblia. Ang pastor nagaingon nga Siya ang Anak sa Dios; mitoo ko sa pastor. Si mama nagaingon nga Siya ang Anak sa Dios; mitoo ko kay mama. Ang akong higala nagaingon nga Siya ang Anak sa Dios; mitoo ko sa akong higala.”

Apan ang bugtong paagi nga ako makaingon nga Siya ang Anak sa Dios, maoy sa dihang ang Espiritu Santo misulod ug nagapamatuod sa Iyang kaugalingon, nan ako nasayod nga Siya gayud ang Anak sa Dios. “Walay tawo ang makatawag kang Jesus, ‘Cristo,’ kondili pinaagi sa Espiritu Santo.” Mao kana!

⁷⁷ Walay tawo nga nagasulti pinaagi sa Espiritu sa Dios nga mitawag kang Jesus nga tinunglo, o moingon nga Siya ingon niini kaniadtong adlaw ug lahi na karong panahona. Nagapahimo kana Kaniya nga huyang ug depektibo. Dili, sir.

Siya mao sa gihapon kagahapon, karon, ug hangtud sa kahangturan. Ang bisan unsa man nga espiritung tinuod magapamatuod niana. Oo.

⁷⁸ Karon, Siya miingon, “Kining mga buhat nga akong ginabuhat buhaton usab ninyo,” Juan 14:12, karon, ang mao gihapon nga mga buhat.

“Oh,” moingon sila, “ang iglesia nagapamuhat man og mas labaw pang mga buhat karon.” Sa unsang paagiha?

Siya miingon, “Ang mga buhat nga akong ginabuhat.”

“Kanang” moingon sila, “bueno, aduna kami’y mga misyonaryo sa tibuok kalibutan, mas dako kana nga buhat.”

⁷⁹ Apan miingon Siya, “Ang mga buhat nga akong ginabuhat.” Karon kini ang inyong buhaton, buhata usá kini, dayon mahimo na nimong hisgotan ang mahitungod sa mga misyonaryo.

⁸⁰ Karon, naghisingot ko dinhi mahitungod sa usa ka Mohammedan kaniadto, nga siya miingon, “Patay na si Mohammed.”

“Husto kana, atua karon siya sa lubnganan, apan sa umaabot nga adlaw mabanhaw siya.” Miingon pa siya, “Kung siya mobangon gikan sa lubnganan, ang tibuok kalibutan mahibalo niini sulod ra sa baynte-kwatro ka oras.” Miingon siya, “Kamo nagaingon nga si Jesus nabanhaw duha ka libo na ka tuig, ug wala pa gani katulohon sa mga tawo ang nasayod niini.”

Kana tungod kay nagsulti ka man gikan sa usa ka intelektuwal nga panan-aw niini. Nagsulti ka gikan sa usa ka panghunahuna nga pang-eskwelahan o pang-edukasyon.

Kung kining tibuok, dakung iglesia sa Dios, nga naglangkob sa Katoliko, Protestante, silang tanan, kung nadawat lang unta ang Espiritu Santo, kining kalibutana malig-on unta nga natukod diha sa Cristianismo; wala unta’y ingon nianang butang sama sa komunismo; wala unta’y ingon nianang butang sama sa panaglalisay, o panag-away, o pagkamadinauton, o pagdinumtanay. Nagalingkod na unta si Jesus sa Iyang Trono, ug nagalakaw na unta kita diha sa mga paraiso sa Dios, nga adunay Kinabuhing Walay Katapusan, nga buhi hangtud sa kahangturan; nga nabanhaw na diha sa bag-ong lawas, nagalakawlakaw, nga dili na gayud matigulang, nga dili na gayud maubanon, dili na gayud magkasakit, ug dili na gayud magutom pa; nagalakaw lamang diha sa kalipay nga iya sa Ginoo, nga nagapakigsulti sa mga mananap. Ug, oh, daw sa unsa nga adlaw! Apan gihimo nato ang tanan na nga gawas sa kung unsa ang Iyang. . .

⁸¹ Siya miingon, “Lumakaw kamo sa tibuok kalibutan ug isangyaw ang Ebanghelyo.” Unsa man ang Ebanghelyo? “Dili lamang ang Pulong, kondili pinaagi sa Gahum ug mga pagpadayag sa Espiritu Santo.” Ginahimo ang Pulong sa Dios nga realidad, mao kana ang Ebanghelyo.

⁸² Dili ninyo kini mahimo. Karon, nasayod si Jesus niana, mao nga kinahanglan Niyang mopuyo sa Iyang Iglesia.

Ug, nahibaloan na Niya nga kita magkaadunay intelektuwal nga mga eskwelahan. Ug dili ninyo Kini makab-ot diha sa usa ka intelektuwal nga eskwelahan. Mosupak gyud sila Niini. Tungod, ang ila lamang nahibaloan mao ang panudlo gikan sa usa ka maalamon nga tawo, gikan sa kung unsa nga kredito o denominasyon nga gusto nila—nga gusto nilang ikinabuhi. Busa sila—ipahimutang ka nila dinha ug himoon kang miyembro niana nga lawas, ug, igsoon, kutloan ka og pipila ka mga butang gikan sa usa ka kredito nga daw sa husto gyud kaayo. “Ang halangdon nga balaang iglesia, ang inahan, nagsagubang kini sa daghang mga paghampak, nagsagubang kini og daghang gibug-aton.” Mao man usab ang yawa; siya gipapahawa, sa bisan asa

nga dapit, halos, ug siya nagapadayon lang sa gihapon. Oo, sir. Oh, mosulay sila sa pagkutlo niini.

⁸³ Busa nahibalo si Jesus nga magkaaduna og usa ka dakung intelektuwal nga kalihokan sama sa nahitabo sa Iyang mga adlaw, sama sa paghugas og mga kulon ug mga kalaha, ug sa pagsul-ob sa mga bisti, nga pinatikig ang mga kwelyo, ug tanan nga sama sa ilang gibuhay kaniadto, ug tanan na niining nagkalainlaing mga butang nga ilang buhaton. Nasayod Siya nga ila kanang buhaton, mao nga miingon Siya, “Bueno kadali lang. Dili Ko kamo biyaan nga walay maglilipay, mobalik Ako pag-usab aron ubanan kamo. Busa,” Siya miingon, “ang mga buhat nga Akong ginabuhay, pagabuhayon usab ninyo.”

⁸⁴ Ang katuyuan sa pagpadala sa Espiritu Santo mao nga aron ang Dios magpadayon pinaagi sa usa ka pundok sa mga tawo, aron padayon nga maipadayag ang Dios sa kalibutan. Eksakto gyud kana. Dili pinaagi sa kredo, dili pinaagi sa denominasyon, kondili pinaagi sa Gahum sa Iyang pagkabanhaw, pinaagi sa paghimong realidad ang Iyang mga Pulong; pinaagi sa pagtuman sa Iyang saad, ug pagbarug dapig sa minoriya, ug pagtoo sa Dios; ug tan-awa n’yo ang mangitngit nga kalangitan nga nagakawala, ug ang Gahum sa Dios nga nagapul ug nagadan-ag. Amen. Mao kana ang Iyang gusto. Alang niana gipadala ang Espiritu Santo. Sa ingon niana nga katuyoan kon nganong Iyang gipadala Kini. Karon nahibaloan na nato kung unsa Kini, ug kung unsa ang hinungdan nga gipadala Niya Kini.

⁸⁵ Busa, walay laing dugo ang makapabalaan sa mga tawo. Dili ko ikaw mabalaan, ug dili mo ako mabalaan, tungod kay pareho kitang natawo pinaagi sa pakighilawas. Apan si Jesus natawo nga dili pinaagi sa pakighilawas, husto kana, busa ang Iyang Dugo mao ang tigpabalaan. Ug nanaug ang Dios, naghimo og usa ka lawas, nagpuyo niini, giula kana nga Dugo alang sa pagbalaan niini, nga bug-os nang gitangtang ang pagkasad-an tungod sa sala ug kaulaw. Dayon, pinaagi sa pagtoo, ingon nga siya nagatoo Niana, ang Dios mokunsad ngadto nianang tawhanong lawas, pinaagi nianang Dugo nga nagabalaan, ug ginahimo siyang Binhi ni Abraham, pinaagi sa pagtoo.

⁸⁶ Ang pag-too lang nga kanang Dugo moabot, kanang putli nga Dugo mahimong usa na ka milagro sama sa iyang dugo, nga naglakaw kaniadto human nga “siya nga daw patay na.” Pero nagtoo sa Dios sulod sa baynte-singko ka tuig, siya nga setenta’y-singko ka tuig na ang kaguwangon kaniadto, ug nagtoo gihapon hangtud nga siya miabot sa edad nga usa ka gatus. Ug si Sarah, nga saisentay-singko na kaniadto, ug nagtoo usab hangtud nga siya nubenta na. “Ug si Abraham kaniadto nga daw patay na.”

Ug miingon ang Dios, “Aron masigurado nga ang mga tawo dili gyud mahikalimot niini, dad-on siya niining bungtod ug

ipahalad siya og usa ka halad.”

⁸⁷ Si Abraham miingon sa mga sulugoon, “Magpabilin kamo dinhi uban sa mula ug hulata ra mi. Ang akong anak ug ako moadto didto ug mosimba, ug kami mamalik ra.” Oh, unsaon kaha niya pagbuhat niana?

Miingon si Abraham, “Gidawat ko siya ingon nga usa gikan sa mga minatay. Ug ako nahibalo nga Siya nga naghatag kaniya kanako, ingon nga usa gikan sa mga minatay, makahimo sa pagbanhaw kaniya gikan sa mga patay kung tumanon ko lamang ang Iyang Pulong. Tumanon, ginatuman ko ang Iyang Pulong; Siya makahimo sa pagbanhaw kaniya gikan sa mga patay.”

⁸⁸ Nga hingpit gayud nagahisgot mahitungod kang Cristo! Mao kana Siya. Ug gikan niadtong selula sa Dugo migula ang Espiritu Santo, nga Kini Mismo naputos sulod sa lawas nga gitawag og Jesus. Kana nga Dugo nagbalaan og usa ka paagi, pinaagi sa pagtoo, aron tawgon ang mga tinubos, o ang mga Pinili sa Dios. Ug sa dihang nadawat na nimo Kana, gitangtang na sa Balaang Espiritu ang tanang pagkamadinauton gikan kanimo, Siya magasulod dayon, ang Dios Mismo, aron buhaton ang Iyang kabubut-on.

⁸⁹ Mao nga, pag ang agalon saputon; ug kining usa pa ka tiguwang *ingon ani-ug-ingon ana* nga ginabuhay ang *ingon ani-ug-ingon ana* dinhi; ug *kinig* tiguwang nga lalaki dili maayo ang ginasulti bahin Niini, batok siya Niini. Ang usa ka tawong puno sa Espiritu Santo mobarug bisan sa atubangan mismo niini. Amen.

⁹⁰ “Ug hing-ilhan nila. Bisang sila mga walay hibangkaagan ug wala makaeskwela, pero hing-ilhan nila nga sila nakigkauban kang Jesus.” Mao kana ang gianhi sa Espiritu Santo.

⁹¹ Usa ra ka ordinaryong mangingisda nga dili gani makasulat sa iyang ngalan. Apan mitindog siya didto ug miingon, “Kinsa man diay ang atong toohan, ang tawo o ang Dios?” Amen. “Ipahibalo ko kini kaninyo, nga kami magawali gihapon sa Ngalan ni Jesus.” Grabe, isog kaayo! Nasayod siya—nga aduna gyud siya’y Balay didto. Husto kana. Ingon nga siya usa lamang ka magpapanaw ug lumalangyaw dinhi. Ug iyang ginapangita ang Siyudad nga umalabot.

Para kaniya unsa ma’y mahimo nianang hipokritong pari kaniya? Siya nga napailalum sa pagmando sa Dios sa Langit, nga maoy nagbanhaw sa Iyang Anak, si Cristo Jesus, ug gipuno siya sa Espiritu sa Dios nga maoy nagbuhat sa langit ug yuta. Mao kana. Wala siya malisang kaniya. Wala, sir. Ni Kamatayon . . .

⁹² Aba, sa dihang gidala nila ang luoy nga si Esteban didto, nga nanag-ingon, “Bawia kana!”

Miingon siya, “Kamo nga mga magahi’g-liog, ug mga dili sinircuncidahan sa kasingkasing ug sa mga igdulungog,

nagabatok kamo gihapon sa Espiritu Santo. Sama sa gibuhay sa inyong mga ginikanan, mao usab ang ginabuhay ninyo.”

Miingon sila, “Bunalan ka namo hangtud mamatay!”

Mitubag siya, “Dili ninyo mahimo kana kung kamo. . .”

“Ipakita namo kanimo kung buhaton ba namo kini o dili!” Ug sila mikuha ug dagkung mga bato ug misugod sa pagbato kaniya sa ulo.

⁹³ Mihangad siya, ug miingon, “Nakita ko ang Langit nga naabli. Nakita nako ang hagdan nga nanaug. Nakita ko si Jesus nga nagatindog sa tuo nga kamot sa Iyang Pagka-Halangdon.” Ug ang Biblia wala nag-ingon nga siya namatay; nahikatulog lamang siya. Oh, grabe! Mahanduraw nako ang usa ka Anghel nga nanaug, ug gikuha siya ug giduyan nga mora’g masuso, sama sa usa ka inahan, hangtud nga siya nakatulog. Oh, grabe! Sigurado.

⁹⁴ Mao kana ang katuyoan sa Espiritu Santo. Mao kana’y hinungdan nganong gipadala sa Dios ang Espiritu Santo. Ang Espiritu Santo mianhi aron sa paghatag kaninyo og Gahum. Aduna pa ko’y pipila ka mga Kasulatan dinhi, sa makadiyut lang. Ang Espiritu Santo mianhi aron sa paghatag kaninyo og Gahum. Ako—dili ko. . . Makita ninyo kini; napahalayo lang ako kaayo, karong gabhiona.

Maghatag kaninyo’g Gahum, Gahum diha sa pag-ampo!

⁹⁵ Tan-awa ang usa ka tawo nga nagkinabuhi og hamugaway, apan kanunay’ng pildi. “Oh, sultihan ko ikaw. . .” Maayong tawo, “Oh, sigurado, gihigugma ko ang Ginoo, Igsoong Branham.” Kanunay’ng pildi, wala gyud sila’y pag-ampo nga gitubag.

Apan tugoti nga mapuno kanang gamay’ng babaye sa Espiritu Santo usa ka higayon, tan-awa kung unsay mahitabo. Pagmoduol siya atubangan sa Dios, siya dili mapildi. May kaisog siya nga moduol sa Trono sa Dios, nga nagatoo. Aduna siya’y katungod tungod usa man siya ka anak nga babaye sa Dios, pinaagi sa usa ka Pagkahimugso.

Tan-awa kanang luoy’ng lalaki, nga talawan kaayo, ginadaugdaug lang siya sa iyang agalon. Apan pagmoingon na siya og, “Bueno kadali lang.” Adunay gyu’y nabag-o, kita n’yo, nadawat niya ang Espiritu Santo. Nagahatag kini kanimo og Gahum. Ang imong kinabuhi puno sa Gahum.

Nagahatag kini kanimo og Gahum sa pagpamulong.

⁹⁶ Aba, tan-awa, kadtong mga tawo nga nangahadlok, nga nagatindog didto; Si Pedro, Santiago, Juan, Lucas, ug ang uban pa kanila. Nakasulod na sila niadtong lawak sa itaas, ug nanag-ingon, “Oh, dili na kita mahimong mosulti pa. Tan-awa sila, didto, aduna si Doktor *Ingon ani-ug-ingon ana* ug si ingon-ana

didto. Aduna usab si Rabbi *Ingon ani-ug-ingon ana* ug ingon-ana. Abi nimo, aduna baya siya'y upat ka digri sa kolehiyo; unsaon man nato pagbarog batok kaniya?" Si Pedro miingon, "Oh, mahinumdom ko nga nabaligyaan ko og isda kanang tawhana usa ka adlaw kaniadto. Siya, siya nakig-estorya, ug wala gani ko kasabot kung unsay iyang ginasulti. Oh, dili gyud ko makabarog batok kaniya." Apan unsay. . .

"Unsa ma'y atong himoon, mga igsoon?"

"Ingon siya, 'Hulat ra ta.'"

"Bueno, upat na ta ka adlaw dinhi."

"Magpadayon lang ta sa paghulat."

"Unsa ka dugay?"

"Hangtud."

"Bueno, nag-ingon ba Siya nga mahitabo kini sa ikalimang adlaw?"

"Wala man Siya nagsulti kung unsa ka dugay. Ingon siya, 'Hangtud nga.'"

Bueno, nagsige sila og hulat. Sa unsa ka dugay? "Hangtud nga." Walo ka adlaw ang milabay. "Hangtud nga." Nilabay ang siyam ka adlaw. "Hangtud nga."

Ug sa katapusan sa miabut nga ang adlaw sa Pentecostes, silang tanan anaa sa usa ka dapit, nga nanaghiusa.

⁹⁷ Ang Dios nagpaibabaw na kanila kaniadto, diha sa nagakalayo nga Panganod; Ang Dios naglakaw na uban kanila, sa yuta; karon aduna na'y lain nga mahitabo. Aduna na'y andam nga mahitabo.

. . .silang tanan anaa sa usa ka dapit, nga nanaghiusa.

Ug sa kalit miabut ang usa ka lanog gikan sa langit . . . ingon sa usa ka makusog nga hangin nga mihuyop, ug gipuno niya ang tibook nga lawak diin didto sila managlingkod.

. . .mga dila nga nabahinbahin . . .milingkod diha . . . kanila.

Unsa man kining *nabahinbahin*? "Napahat-pahat." Kini sama sa nagbungabunga, nakadungog na ba kamo'g usa ka tawo nga nagkabungabunga? Sila nagsige'g, "uh-uh-uh, oh, uh-uh," kita n'yo, dili sila makasulti'g bisan unsa. "Nabahinbahin, napahat-pahat." Sama *sa usa ka buak* nga kuko, nagpasabot sa usa ka butang nga "nagbulag, nabahin," Wala sila nag-istoryahanay. Wala sila nagtabitabi. Wala sila'y gibuhay nga unsa man gawas sa paghimo'g kasaba.

...*mga dila nga nabahinbahin* milingkod sa matag usa kanila, nga daw kalayo. (Oh, dili sila makapugong sa ilang kaugalingon!)

Ug silang tanan napuno sa Espiritu Santo, . . . (Whew!)

⁹⁸ Dayon unsay nahitabo? Migawas sila ngadto sa kadalanan. “Asa na kadtong si Rabbi Jones? Asa na ang maong tawo? Ug hain na kadtong higante sa pagka-intelektuwal?”

“Ang Dios anaa sa ibabaw nato kaniadto, uban ni Moises, diha sa nagdilaab nga sampinit; gipakaon ta Niya og mana, gikan sa Kahitas-an. Naglakaw Siya uban kanato sulod sa tulo ka tuig ug unom . . . tulo ka tuig ug unom ka bulan, dinhi sa yuta. Apan karon ania na Siya sa sulod ko. Dili ako ang nagasulti; kondili Siya. Naila ko kung Kinsa Siya, ug naila ko usab kung kinsa ako. Dili na ako kini; Siya na.”

Dad-a siya dinhi! *Katawhan sa Israel, ug . . . kamo nga nagapuyo sa Judea, tugoti nga kini ipahibalo ko kaninyo—ipahibalo kaninyo, ug patalinghugi ang akong tingog, kamong tanan nga mga magwawali ug mga magtutudlo.*

Whew! Grabe! Gahum sa pagpamulong! Oh! “Kini sila dili mga hubog!” Nagbarog alang niadtong gamay’ng minoriya, usa ka gatus ug baynte, batok sa napulo ka libo o labaw pa.

...*kini sila dili mga hubog, ingon sa pagdahum ninyo, kay ikatolo pa lamang karon sa takna sa adlaw.*

Ako usa ka magwawali sa tibuok Ebanghelyo. *Apan kini mao kana nga sama sa gisulti ni propetang Joel;*

...*mahitabo sa ulahi nga mga adlaw, nagaingon ang Dios, igabubo ko . . . ang akong Espiritu* (whew) *sa tanang unod: ug ang inyong . . . Nakita ninyo si Maria didto nga nagasayaw diha sa Espiritu, nagasulti og mga dila ug kung unsa pa ang ginabuhat? . . . sa tanang unod: . . .*

...*ug sa akong mga sulogoong babaye igabubo ko . . . ang akong Espiritu; . . .*

...Ipakita Ko ang mga ilhanan sa kalangitan sa *ibabaw, ug . . . sa kalibotan* sa ubos; . . . mga haligi nga *kalayo, ug* mga inalisngaw sa aso:

Ang Dios anaa na sa Iyang katawhan kung ingon niana. Amen.

“Bueno, karon, unsa ang imong nakuha nga digri? Asa, unsang eskwelahan ka gikan?”

⁹⁹ “Wala na kana nagahatag og kalainan karon.” Oh, nagsugod siya sa pagkutlo og Kasulatan.

(Nakita na Siya kaniadto pa ni David!) . . . *Giuna ko ang Ginoo sa kanunay . . . aron ako dili matarug:*

...dugang pa *ang akong kasingkasing* nagmaya, tungod kay... *ug ang akong dila* nagakalipay;

...*dili* niya *pagpasagdan ang akong kalag sa hades, ug dili gyud niya itugot ang iyang Usa ka Balaan makakita sa pagkadunot.*

...*makahimo ako sa pagsulti diha kaninyo sa dakung kasayon mahatungod kang David nga patriarca,...* *namatay siya ug gilubong, ug ang iyang lubnganan ania kanato...karong adlaw.*

Apan pinaagi sa usa ka propeta...nakita na niya daan ang pag-abot sa Usa nga Matarung.

...ug tugoti nga kini ipahibalo ko kaninyo, *nga gihimo sa Dios* kining *mao rang Jesus*, Nga inyong *gilansang sa krus* pinaagi sa inyong *dautang mga kamot, ang mao rang Ginoo ug Cristo.* (Amen!)

¹⁰⁰ “Mga igsoon, unsa na man ang angay namong buhaton aron maluwas?”

...miingon, *Paghinulsol*, ang matag usa kaninyo, ug *pagpabautismo sa ngalan ni Jesus Cristo alang sa kapasayloan sa inyong mga sala, ug makadawat kamo og gasa sa Espiritu Santo.*

Kay alang kaninyo mao ang saad, ug ngadto sa inyong mga kabataan, ug sa ilaha niadtong naa sa halayo, sumala sa kadaghanon sa tawo nga pagatawgon sa atong Ginoong Dios. (Amen.)

¹⁰¹ Hangtud nga ang Dios aduna pa’y katawhan, ang Dios aduna pa’y Iglesia, ang Dios adunay Espiritu Santo nga nagamartsa uban Niini. Mao kana’y hinungdan nganong gihatag sa Dios ang Espiritu Santo. Ang mga intelektuwal manungha; sa una pa kana. Apan ang Dios aduna gyu’y usa ka minoriya sa kung asa man. Kanunay’ng ang Dios adunay gamay’ng Iglesia nga magpadayon sa bautismo sa Espiritu Santo, aron maangkon ang Kahayag. Ug mao sila kadtong, magahukom sa kalibutan, pinaagi sa ilang pagpamatuod.

Dili ba ang Biblia nagsulti sa giingon ni Jesus, “Bulahan ang mga putli og kasingkasing; kay sila makakita sa Dios”? Ug dili ba Kini nagasulti, nga, “Ang mga matarung, ang mga balaan, mao ang magahukom sa kalibutan”? Sigurado.

Ang imong pagpamatuod sa karong panahon maoy mohatud og paghukom batok niining siyudara. Ang atong pagpamatuod sa bautismo sa Espiritu Santo ug sa Gahum sa Dios, ang balaan nga pagkinabuhi, maoy magahatud og paghukom batok sa siyudad. Sa dihang kini...

¹⁰² “Sila nga mga nahauna mahimong maulahi; sila nga naulahi mahauna.” Dili nako mahibaloan ang bahin kang Sankey ug

Moody, ang ilang pagkabanhaw. Ug dili usab nila mahibaloan mahitungod sa akoa, bahin niini. Apan barugan ko kining usa, sa paghatag og pagpamatuod; ug kamo usab.

Ug pinaagi niana, pinaagi sa pagpakaylap sa inyong Kahayag, ug sa bautismo sa Balaang Espiritu, ug pinaagi sa mga kinabuhi nga inyong gikinabuhi, ug ang mga butang nga gibuhat sa Dios aron pamtud-an nga Siya nagapamuhat dinhi; ug tungod sa ilang pagka-intelektuwal, mipahilayo sila gikan Niini; pagahukman gayud sila sa mga balaan. Mga hinukman na sila. Human na silang gihukman. Oh, grabe!

¹⁰³ Nagahisgot ako bahin sa Gahum sa pag-ampo, Gahum sa pagpamulong, Gahum alang sa balaan nga pagkinabuhi. Amen. Ingon niana ang pagabuhaton sa Espiritu Santo.

¹⁰⁴ Ang uban kaninyo nga nagalakaw-lakaw, nga nagaingon, “Bueno, dili gyud ko makahunong sa pag-inom. Dili gyud ko makabiya *niini*.”

Nagaanha ang Espiritu Santo aron mopuyo sa sulod nimo, aron tangtangan gikan kanimo kining tanan nga *mga dili* ko mabiyaan. Husto kana. Ipahunong ang mga babaye sa pagpaputol sa ilang buhok, ipaundang kanila ang pagsul-ob og mga purol ug karsones. Walay ikapangulipas. Ipahunong kanila ang mga pagtabi-tabi. Oh, oo, alang nianang katuyoan Kini, aron ipakinabuhi ka og balaan nga pagkinabuhi. Ipasunod ka Niini sa mga sugo sa Biblia sa matag higayon.

¹⁰⁵ Ang babaye moingon, “Init man gud kaayo; kini lang akong isul-ob. Makapalabad man gud sa ulo kung patas-on nako ang akong buhok.”

Apan walay ikapangulipas diha sa Espiritu Santo. Anaa Kini dinha aron maipahigayon kana. Eksakto Kining magasunod sa Pulong. Ingon niana ang buhaton sa Espiritu Santo.

Kini ang magpalingiw kanimo nga lalaki sa imong ulo palayo kanila nga mga babaye nga mga halos hubo na, ug magpaundang kanimo sa pagpangibog kanila, ug mga miyembro pa gyud sa iglesia. Ingon niana ang buhaton Niini.

¹⁰⁶ Kini ang magpahunong kanimo sa pagpanigarilyo ug pag-inom, ug ang...magpahunong kanimo sa pagtinguha nga mamahimong popular. Kini ang magtangtang niana gikan kanimo. Himoon ka Niini nga mapainubsanon kung buhaton mo kana. Alang niana ang Espiritu Santo. Alang Kini sa pagkinabuhing balaan. Husto kana. Paundangon ka sa pagpanglibak. Paundangon ka sa pagdula og baraha, pagdula og dais sa sugal, ug tanan na niining mga ginabuhat mo sa tago.

Paundangon ka Niini sa imong pagpadayon sa imong ginabuhat, ang pagkadili-matinud-anon sa imong asawa. Mao kana ang pagabuhaton Niini. Husto kana. Paundangon ka Niini

sa pagtinguha nga minyoan ang asawa sa ubang tawo. Husto gyud kana.

Ingon niana Kini. Ipakinabuhi ka Niini og kinabuhing balaan. Alang niana ang Gahum sa Espiritu Santo, “aron itumong ang inyong mga hunahuna ngadto sa mga butang nga anaa sa Itaas,” diin ang Dios nagatindog sa...?...nga ang hunahuna ni Cristo anaa kanimo. Dili man nimo malikayan nga makita kanang mga butanga; apan pagmakita nimo sila, ginalingiw mo ang imong ulo. Husto kana. Kini ang makapahimo kanimong ingon niana.

¹⁰⁷ Moingon ka, “Dili nako mahimo kana. Oh, di gyud nako kana mahimo.” Sigurado, dili *mo* gyud mahimo.

Apan ang Balaang Espiritu mianhi alang niana nga katuyoan. Ingon niana ang ginabuhat Niini. Mianhi Kini aron tangtangan kana gikan kanimo, kanang tanang dugay na nga mga bisyo ug ingon-anang mga butang nga imong ginabuhat.

Kanang mga pagpanglibak, ang paglain-lain sa imong kaugalingon, nga nagaingon, “Dalaygon ang Dios, usa ako ka Methodist, wala ako’y labot kanila nga mga karaang holy-roller.” Ang Espiritu Santo mianhi aron tangtangan kana gikan kanimo.

¹⁰⁸ “Usa ako ka Baptist. Presbyterian ako. Dili gyud ko moanha nianang gamay’ng pundok sa mga holy-roller.” Ang Espiritu Santo mianhi aron tangtangan kanang tanan nga pagkatig-a gikan kanimo. Mao kana ang gibuhat Niini. Ginahugasan ka Niini diha sa Dugo; ginapahapsay ka. Mianhi Siya aron buhaton kana.

Mianhi Kini aron tul-iron ka. Miingon Siya, “Pagapatagon ang gansang-gansangong mga dapit.” Mao kana ang gianhi Niini; aron pagapatagon kana. “Pagapaubson ang hatag-as nga mga dapit; himoon ang tanang kabukiran nga daw sa nagsayaw-sayaw sama sa gagmay’ng mga nating karnero, ug ang tanang mga dahon magapakpak sa ilang mga kamot, nganha kanimo.” [Ginapakpak ni Igsoong Branham ang iyang mga kamot—Ed.] Aduna na’y kalahian ang pag-awit sa mga langgam. Nagabagting na ang mga lingganay sa kalipay. Walay ikapangulipas. Mao kana ang gianhi Niini. Mao kana ang katuyoan sa Dios sa pagpadala sa Espiritu Santo, aron imong buhaton kining mga butanga, nga ikaw magalakaw sunod Kaniya.

¹⁰⁹ Karon dili ko gusto nga pasakitan kamo, apan gisultihan ko na kamo nga ania ako karon nga kinasingkasing ang sinseridad. Aron likayan nga mapasakitan kamo, panalagsa molaktaw ako og usa ka linya sa kung asang dapita; ug nagapabilin diha sa Kamatuoran, apan nagapabilin dinha ug buhaton kini sa usa ka paagi nga dili kamo makapasakit pag-ayo.

¹¹⁰ Pero aduna ko'y gustong isulti sa inyo. Kung ang Biblia nagaingon nga sayup alang sa usa ka babaye ang pagputol sa iyang buhok, ug moingon ka nga aduna ka'y Espiritu Santo apan nagapaputol ka sa imong buhok, matingala gyud ko kung aduna ka ba kaha. Ayaw kasuko; ug kung nasuko ka, nagapakita kana nga adunay usa pa ka marka batok kanimo.

¹¹¹ Kung ang Biblia nagaingon nga sayup alang sa usa ka babaye nga magsul-ob og bisti nga iya sa lalaki, ug nagsul-ob ka niining mga karaang overall ug mga karsones nga nagalakaw-lakaw sa dalan, kamong mga hingkod na man unta nga babaye! Siguro puede nga ang gamay'ng bata . . . nga, magdula sila uban sa mga batang lalaki ug ingon-anang mga butang. Apan, tan-awa, ingon nga kamo—kamo'y hamtong na nga mga babaye, kinse, dise-sais, dise-otso na ang kagulangon, hangtud sa lola, nga nagalakaw-lakaw dinha sa dalan! Ug ang Biblia nag-ingon, “Kini usa ka dulumtanan sa atubangan sa Dios,” alang sa usa ka babaye nga magsul-ob sa maong mga butang. Ug ginasul-ob ninyo kini, sa gihapon, ug moingon mo nga aduna kamo'y Espiritu Santo? Nalibog gyud ko usahay. Ang Espiritu Santo nagasunod kanunay sa Pulong sa Dios sumala gyud sa nahisulat.

Ug ang usa ka magwawali luyo sa pulpito, nga walay igong grasya aron iwali Kini, nagaduhaduha ko kung nadawat ba gyud niya Kini. Eksakto gyud kana! Bueno, alang niana ang Espiritu Santo.

¹¹² Kini maoy magahatag og pagdihog sa magwawali. Kini maoy magpabalaan sa pundok. Kini mao ang magpahimutang sa Iglesia sa kahan-ayan. Kini ang magahatud og panagkahiusa sa Espiritu. Kini mao ang maghiusa kanato sa Gahum. Kini maoy maghiusa kanato nga may gugma, gugmang inigsoon.

Wala ko'y labot kung Methodist ka, Baptist, Presbyterian, Lutheran, o kung unsa man ka, kon kitang tanan nabautismohan sa usa ka Balaang Espiritu ngadto sa usa ka Lawas, ug nahimong mga sakop sa Lawas ni Jesus Cristo, walay . . . walay unsa man sa karon, walay unsa man sa umalabot; kagutom man, o tumang kagutom; walay makapabulag kanato gikan sa gugma sa Dios, sa gugma ni Cristo, “gugma sa Dios nga anaa kang Cristo,” natawo kita diha sa Iyang Espiritu, nahugasan sa Iyang Dugo. Kita bag-o nang mga binuhat. Mao kana ang gianhi sa Dios nga buhaton. Alang nianang katuyoan nga mianhi ang Balaang Espiritu. Oo, sir. Mao kana.

¹¹³ Karon, mga tawo, tan-awa ako, sa nawong. Daghang mga kamot ang mipataas, nga nag-angkon nga adunay Espiritu Santo; kita n'yo, sigurado ko, nga daghan gyud. Oh, karon ako—ako medyo magdiretsahan sa' ko og diyutay sa karon. Ginarekord kini sa teyp. Apan mas daghan pa ang atong mahisgotan mahitungod niini ugma sa gabii.

Kung moingon ka nga nadawat na nimo Kini, apan sad-an niining mga butanga, nalibog ko kung unsa ang nagapanguna kanimo. Dili gyud ka ipatipas sa Dios sa Pulong. Ipapabilin ka Niya sa Pulong, tungod kay mao kana Mismo ang mga balaod sa Dios, sa Iyang Iglesia, alang sa Iyang katawhan, para sa mga babaye, ug para sa lalaki.

¹¹⁴ “Bueno,” moingon ka, “dili man kini makadaut kanako kung buhaton ko ang *ingon niini* o *ingon niana*.” Dili ba kaha? Ang Pulong nagaingon mismo nga makadaut kini.

Ug kung ang Balaang Espiritu anaa kanimo, Kini motultol mismo kanimo paingon sa Pulong. Wala’y ikapangulipas. Ang Dios wala nagahimo’g mga pag-usab o mga pasumangil. Siya nagapahamtang og lagda ug kinahanglan nga mosunod ka niana. Kana lang. Ingon niana kini para sa tanan. Mosunod ka sama sa uban pa.

¹¹⁵ Si Pedro miingon, “Paghinulsol kamo, ang matag usa kaninyo; pagpabautismo, ang matag usa kaninyo, sa Ngalan ni Jesus Cristo alang sa kapasayloan sa inyong mga sala, dayon makadawat kamo og gasa nga Espiritu Santo.” Kita n’yo? Mao lang kana. Kinahanglan nakalinya kita niana.

¹¹⁶ Karon dili ko tuyo nga pasakitan kamo; kay gihigugma ko kamo pag-ayo. Apan, igsoong lalaki, igsoong babaye, naamgo ba ninyo, nga . . . ako kinahanglan mobarug sa katapusang mga adlaw nianang pagkabanhaw, uban niining henerasyon sa mga tawo, ug manubag tungod niini nga Pulong? Ug ginapakita kini sa Balaang Espiritu, ug ako nga ginasangyaw Kini didto, asa pa man diay ka mobarug? Unsaon nimo paglikay niini? Dili nimo kini mahimo, higala. Ayaw. Hunonga na kana. Bisan unsa pa kanang ginabuhat nimo nga sayup, hunonga kana.

Moingon ka, “Dili nako mahunong.”

Dayon wala pa gyud diay dinha Kanang makapahimo kanimo niana. Kay kung anaa na ang Balaang Espiritu, ginahatagan ka Niya og Gahum nga pangibabwan ang kalibutan. Ug kung ikaw . . . Paminawa kung unsay Iyang giingon. “Kung ginahiguma nimo ang kalibutan o ang mga butang nga iya sa kalibutan, kini tungod kay ang gugma sa Dios wala kanimo.” Karon, wala gayu’y ikapangulipas. Gipatinaw na Niya kini, ug kinahanglan nga nakasunod kita nianang lagda.

¹¹⁷ Nasayod man ko nga makapalagot gyud ko sa inyong tanaw. Apan puno lang gyud ko karon. Kita n’yo? Paminaw. Tinuod kana. Karon pagduol mo Niini, igsoong lalaki, igsoong babaye.

¹¹⁸ Ayaw tugoti nga kanang pipila ka mga intelektuwal nga kolehiyo sa palibot dinhi magaingon kaninyo, “Oh, tiniguwang og kinaraan na kana.”

Kung Kini tinigulang lang kini nga butang, nan ang Dios mao usab. Ug kung ang Dios kinaraan, nan ako mao, usab. Amen. Gusto kong mahisama Kaniya. Ngano man? Ang Iyang Espiritu ania man kanako, nga nagakagutom ug nagakauhaw, nga ginatawag ang tanan nga supak sa Pulong og. . .

¹¹⁹ Kung ang mga tawo moingon, “Okey ra kana, oh, kung ang usa ka tawo magdula og mga baraha aron malingaw lang, ug magsugal og usa o duha ra ka sentimos. Okey ra kana.” Apan ang Dios nagaingon nga dili kana okey.

¹²⁰ “Oh, kung moinom ka og pang-pakighimamat ra man, ug mahubog ra man og gamay, usahay.”

Apan ang Dios miingon, “Alaut siya.”

¹²¹ “Oh,” moingon ka, “okey ra kana, Igsoong Branham. Ako—Ako—Ginaputol nako akong buhok alang man sa maayong katuyoan. Ang babaye, abi nimo, ang ubang mga babaye nagabuhat na man gud niini.” Wala ko’y labot kung unsa ma’y ginabuhat sa ubang mga babaye. Dili sila ang imong sumbanan o imong agalon. Kung aduna kanimo ang Espiritu Santo, pagasundon mo ang Iyang mga sugo bisan unsa pa ang isulti sa mga tawo mahitungod kanimo.

¹²² “Bueno, Igsoong Branham, init man gud kaayo, ug mao nga kinahanglan kong isul-ob kining mubong *ingon ani-ug-ingon ana* nga sinina.” Mas init baya ang impiyerno kaysa niana, minahal nga igsoong babaye. Tugoti kong isulti kanimo kana. Ug—ug ayaw. Ug timan-i kana.

¹²³ Ug ang Balaang Espiritu mogiya kanimo kanunay ngadto sa Kamatuoran, ug ang Iyang Kamatuoran mao ang Pulong. “Ang Akong Pulong mao ang Kamatuoran. Pasagdi nga ang pulong sa tanang tawo mahimong bakak, apan ang Ako mao ang matuod.”

Ug hunahunaa n’yo, “usa kini ka dulumtanan.” Mahunahuna ba ninyo kana?

¹²⁴ Kini dili maayo nga pulong para isulti sa usa ka ministro, apan ako nakasulod na sa mga kasilyas sa mga lugar diin kini. . . Halos, mogawas na lang gyud ka’g balik, tungod grabe gyud ka. . . Ug law-ay kaayong mga sinulat diha sa bungbong. Akong hunahuna, “Naunsa na man nga grabe na ka bastos ang mga tawo karon?” Ug ngil-ad kaayo! Ug kung makasulod ako sa nianang mga lugar, kanunay kong mahunahuna, “Pagka ngil-ad gayud!” Ako. . . Didto, gunitan nako ang akong ilong nga ingon *niini*, aron mahugasan nako ang akong mga kamot. Mahadlok ko nga inig gunit nako sa kuptanan sa pultahan, pag-usab, siguradong may mga kagaw gyud dinha gikan sa pakighilawas ug mga butang nga sama niana. Hunahuna nako, “Oh!”

¹²⁵ Usa ka adlaw, atua ako sa usa ka tugpahanan, misulod ako sa usa sa nianang mga lugar, o didto sa estasyon sa tren, misulod ko didto. Ug nahunahuna ko, “Oh, grabe.”

126 Ug Adunay miingon kanako, “Ingon niana ka baho ang kalibutan ngadto sa Dios. Usa ka kangil-aran.”

127 Nahunahuna ko, sa dihang makakita ko’g usa ka babaye nga nagalakaw sa dalan, nga ingon niana ang taras, ug nagsul-ob og bisti nga iya sa lalaki, ingon niana ang pagtan-aw kaniya sa Dios. Usa ka dulumtanan, usa ka butang nga mahugaw ug ngil-ad, sa atubangan sa Dios. Bisan pa niana, nagasimba siya kada Domingo, ug nagasinina’g pormal.

Aduna puy usa ka lalaki, nga nagainom og makahubog, ug nagapanikas, ug nahigugma sa kuwarta, ug ginatikasan ang iyang silingan, ug tanan na lang, aron lang nga makapanguwarta og dugang; ug ginabuhat kining mga butanga, ug nagasugal, ug nagapanigarilyo, ug nagainom, ug nagapamakak; ug dayon nagasimba ug magtestimonyo pa gani. Kangil-aran! Kahugawan! Mao kana ang intelektuwal nga iglesia.

128 Moingon, “Bueno, miyembro man ako sa iglesia.” Oo, temporaryong ihunong usà ang pagsimba, sulod sa kinse ka minuto, aron ang tanang mga diakono ug silang tanan makapanigarilyo, ug ang pastor, pud, sa dili pa sila mobalik sa pagsimba. Sultihi ko! Ipahilayo ang inyong kaugalingon gikan nianang mahugaw’ng butang!

129 “Paghinugawan mo ang lawas; Akong pagalaglagon kini.” Miingon ang Dios nga Iya gyud kanang buhaton. Ug karon, tungod sa kanser, naghinungdan og sobra sa nobenta ka porsyento sa mga namatay, tungod sa kanser sa tutunlan ug baga, tungod sa pagpanigarilyo. “Paghinugawan mo ang lawas; Akong pagalaglagon kini.” Mao nga pa-impverno gyud sila, nga wala nila hingsayran, tungod kay padayon nilang ginabuhat kana.

Ug tungod sa usa ka magwawali nga nagatindog sa pulpito nga adunay upat ka digri, gikan sa kolehiyo, pero siya mismo, nagapanigarilyo pud. Sultihan ta ka, igsoon. Gipadala ang Espiritu Santo aron sa ipahigawas ang mga lalaki ug mga babaye gikan nianang butanga. Ilain ang inyong kaugalingon!

Ang pulong nga *iglesia* nagapasabot og “mga nahimulag.” “Panggawas kamo gikan kanila,” ang ingon sa Biblia. “Ayaw paghikap sa ilang kahugawan, ug dawaton Ko kamo; ug kamo mamahimong Akong mga anak nga lalaki ug babaye, ug Ako mahimong Dios kaninyo.” Oh, grabe! Dili ko buut mamahimong dautan kaninyo, apan buut kong magmatinuuron ug magmatinud-anon. Oo, sir. Oh, pagkamalilisang gayud nga butang!

130 Mga lalaki ug babaye, asa man kita nagabarog karon? Asa na man kita? Muhunong sà kita.

131 Niadtong miaging gabii, nakahay-ad ako diha sa usa ka gamay nga karaan nang lingkoranan sulod sa lawak,

(ug kinahanglan ko nang tapuson), usa ka mapilo-pilo nga lingkoranan. Human sa pag-ampo sulod sa tulo o upat ka adlaw, miabot ako sa usa ka punto, nga dili mahimutang, ug magsige'g hunahuna, "Oh Dios," ug atua na ako sa kahimtang nga wala na ako mahibalo kung unsay akong buhaton. Miingon ko, "Dios, ania na kami sa tumoy sa among panaw. Ug naamgo ko nga may mga butang akong napasagdan. May mga tawag kanako nga angay'ng adtoan, ug gikapoy ako, ug dili ko gustong buhaton." Dayon nahunahuna ko ang akong Ginoo nga nagsusapinday didto sa mangitngit nga agianan, sa dihang gikapoy na kaayo Siya nga halos dili na Niya mailakang ang usa Niya ka tiil sunod sa usa pa, apan dili sab Niya mahimong. . . Ngani mihunong Siya alang sa babaye nga taga-Nain, ug alang usab sa batang lalaki nga gidala didto nga patay na; hangtud nga miadto Siya ug gihikap ang lungon, ug gigamit ang gamay'ng kusog nga anaa Kaniya aron banhawon kadtong batang lalaki. "Bueno, nganong gikapoy man ako? Unsa ma'y nahitabo nako, Ginoo? Sa akong hunahuna, 'Tingali, tungod nagkatigulang na ko. Ako—dili na nako mahimo kini.'"

¹³² Atua si Moises kaniadto, nga nangalagad sa mao ra nga Dios nga gialagaran nako, nga nagatindog didto, sa kaguwangon nga usa ka gatus ug kaluhaan.

Atua usab si Caleb, nga nagatindog didto sa kaguwangon nga nubenta, nga naggunit og espada, ug miingon, "Si Josue ang nagbutang niining espada sa akong kamot, kwarenta ka tuig na ang milabay." Otsenta na siya niadto. Miingon, "Kusgan gihapon ko karon sama sa kung unsa ako kaniadto." Amen.

Ingon ko, "Dios, kaloy-i ako."

¹³³ Ingon ko, "Bueno, tan-awa dinhi, ako kanunay. . ." Ug akong gikuptan ang akong asawa (niadtong higayona) sa kamot, ibabaw niining Biblia ug sa iyang gamay nga Biblia, ug miingon ko, "Honey, negatibo kaayo ko. Ngani ginabadlong ako sa Balaang Espiritu sa sulod nako." Miingon ko, "Nahinumdum ko kadtong mga squirrel didto. Nahinumdum ko si Hattie Wright kaniadto, ug ang mga anak niyang lalaki. Nahinumduman ko ang gibuhat sa Dios, nga ginapakita Niya nga Siya'y Dios, nga mahimo Niya ang paglalang." Alleluyah!

Nahunahuna ko, "Gisultihan na Niya ako niana, daghang mga tuig na ang milabay, 'dili Ko gayud ikaw biyaan. Dili Ko ikaw isalikway. Walay tawo ang makaasandang kanimo, sa tanang mga adlaw sa imong kinabuhi. Ako magauban kanimo. Ug sugod niining pagpang-ila pinaagi sa kamot, moabot kini sa punto nga mahibaloan nimo ang mga tinago sa kasingkasing. Pagkahuman niana, motaas pa kini nga motaas.' Pagkasunod niana nga tuig, bug-os kini nga mapamatud-an, sa tibuok kalibutan. Ania na, kining usa pa ka gamhanang ministerio, nga mas labaw kaayo niini."

Ingon ko, “Honey, kuhaon ko ang imong kamot. Pinaagi sa tabang sa Dios ug sa grasya sa Dios, ayaw na gayud ako tugoti nga mahimong negatibo pag-usab. Tugoti ko nga moadto niining rebaybal aron magsangyaw nga dili na pareho kaniadto. Tugoti ko nga, magpabalaan usà sa akong kaugalingon, aron sa paghatag og dalan alang sa mga tawo; nga ang akong kaugalingong mga sala, ang akong kaugalingong mga kapakyasan mapailalum sa Dugo, ang akong kaugalingong mga kakulangan mapailalum sa Dugo, aron ako makalakaw ug makaingon nga, ‘Pagsunod kamo kanako, mga igsoon.’” Husto kana.

Dili ko gustong makakita og tawo nga moingon, “Sige buhata kini.” Ang gusto kong makita mao ang usa ka tawo nga manguna sa pagbuhat niini. Oo, sir.

¹³⁴ Usa ka higayon kaniadto dinhi, adunay sunog dinhi sa siyudad, ang Pfau Oil Company nasunog. Aduna sila’y Jeffersonville Fire Department didto. Ug ang usa nako ka higala, buotan nga tawo, wala naanad sa dagkung mga sunog nga sama niana, miadto siya didto, nga nagaingon, “Bugahi og diyutay’ng tubig *dinhi*, mga bata. Bugahi og diyutay’ng tubig *dinha*.”

Ania miabot ang gamay’ng bombero gikan sa Clarksville, “ding, ding, ding, ding,” nagadagan paingon didto. Ug siya miingon, ang hepe sa bombero milukso, miingon, “Bugahi og diyutay’ng tubig *dinhi*. Gubaa kanang bintana *dinha*. Bugahi *dinha* og diyutay’ng tubig.”

¹³⁵ Apan tabok sa suba miabot ang mga nabansay nga mga bombero gikan sa Louisville. Kadtong daku nga kaw-it ug hagdan wala mihunong hangtud nga ang hepe nakaabot niadtong taas sa hagdanan. Sa dihang napasaka na ang hagdanan, tua na siya sa taas. Gibalibag niya iyang atsa sa wala pa siya nakaabot didto, ug giguba ang bintana, miingon, “Ari na mo, mga bata!” Mao kana. Napalong ang kalayo sulod ra sa pipila ka minuto.

Dili nga, “Bugahi og diyutay’ng tubig *dinhi*. Bugahi og diyutay’ng tubig *dinha*.” Mahunahuna mo hinoon, kining pipila ka mga intelektuwal nga magwawali.

¹³⁶ Ari na mo! Adto na ta! Nasayod ko nga Kamatuoran Kini. Natilawan ko ug nakita ko mismo. Himaya! Husto ang Espiritu Santo. Ang Dios maayo. Dili nga sulayan mo *dinhi*, sulayan *dinha*; manglakaw kita paingon Kaniya! Anaa Siya dinhi. Para kini kanimo. Gihatag sa Dios ang Iyang Gahum ngadto sa Iyang Iglesia. Dili nga bugahi *kini* dinhi, ug bugahi kana; wala gyud ka’y mahimo niana. Manguna Ka! Amen. Uh! Whew! (Dili na gani ko makakita pinaagi niini.)

¹³⁷ Amen! Unsa ma’y atong buhaton? Ang matag tawo nga nagalingkod dinhi puno sa kung unsa.

Dayon tapuson ko na; tingali kinahanglan ko na, pagkahuman niana.

Puno gyud kamo sa kung unsa. Dili mo makalingkod dinha nga dili puno sa kung unsa. Aduna gyu'y kinabuhi diha kaninyo. Kana nga kinabuhi maoy nagakontrolar kaninyo, ug kana nga kinabuhi ginakontrolar sa usa ka espiritu.

Karon, tingali puno ka sa kalibutan, nahigugma sa kalibutan o sa mga butang nga iya sa kalibutan. Ang Dios maluoy unta kanimo.

Tingali puno ka sa mga kredo gikan sa kung unsa nga iglesia, pipila ka hamubong mga pag-ampo nga imong ginapangamuyo, nagadahum ka nga kinahanglan mong mag-ampo ngadto sa usa ka tawong patay na, o—o paghimo sa kung unsang klase sa usa ka pagpanguros sa inyo. Kaluy-an unta ka sa Dios.

¹³⁸ Ug tingali puno ka og relihiyon, ug mas grabe pa kana. Husto kana. Husto kana. Ang Biblia nag-ingon, “Sa katapusang mga adlaw sila’y mamahimong relihiyoso kaayo, nga nagabaton og dagway sa pagka-diosnon; nagabaton og dagway sa pagka-diosnon, apan nanagdumili sila sa Gahum niini: magpahilayo ka gikan kanila.”

Kung ikaw puno og relihiyon, ikaw makalolooy; relihiyon lang kana, mao lang kana. Kung puno ka sa mga kredo, wala ka mahibalo sa imong ginasulti. Kung puno ka sa kalibutan, nan buta ka.

¹³⁹ Ug dayon, usab, mahimong puno sàb ka sa Espiritu Santo. Amen. Nanghinaut ko nga ikaw puno sa Espiritu Santo. Ug, kon dili man, nanghinaut ko nga ikaw mapuno. Ug kung puno ka sa Espiritu Santo, unsa ma’y anaa kanimo? Aduna ka’y Gahum. Aduna ka’y gugma. Aduna ka’y kalinaw. “Ihatag Ko kaninyo ang akong kalinaw; dili ko kini ihatag, sama sa paghatag sa kalibutan.” Aduna ka’y kalinaw. Naselyohan na ikaw. Aduna ka’y ilhanan. Amen. Aduna ka’y kapahulayan. Aduna usab ka og kalipay nga dili maasoy, ug puno sa himaya. Nakaangkla ka na. Oh, grabe! Ingon niana ka, kung ikaw adunay Espiritu Santo. Ikaw adunay . . . Kung puno ka sa Espiritu Santo, “Ikaw nakalabang na gikan sa kamatayon ngadto sa Kinabuhi,” nga nagahulat na lang sa pang-tanan nga pagkabanhaw sa katapusang adlaw.

¹⁴⁰ Diha sa umalabot nga kalibutan, pinaagi sa atong Ginoong Jesus Cristo, nga kita makakita Kaniya nga nagaabot diha sa himaya ug kahalangdon, “Ang dagat mitugyan sa mga patay nga anaa niini.” “Ang madunot nga mga lawas niadtong nangatulog diha Kaniya . . .”

“Nangatulog diha Kaniya.” Sa unsang paagi ka maanaa Kaniya? “Pinaagi sa usa ka Espiritu gibautismohan kitang tanan pasulod ngadto sa usa ka Lawas.”

“Ang madunot nga mga lawas niadtong nangatulong diha Kaniya pagailisan ug himoon nga sama sa Iyang Kaugalingong mahimayaon nga lawas, diin Siya makahimo sa pagsakup sa tanang mga butang ngadto sa Iyang Kaugalingon.”

“Nadungog ko ang usa ka Tingog gikan sa Langit,” ingon si Juan, “nga nag-ingon kanako, ‘Isulat, “Bulahan ang mga patay nga nangamatay diha sa Ginoo...”’” Sa unsang paagi mo makasulod? “Pinaagi sa usa ka Espiritu gibautismohan kita ngadto sa usa ka Lawas.” “... nga nangamatay diha sa Ginoo nga sukad karon; aron nga managpahulay sila gikan sa ilang paghago; ug ang ilang mga buhat naganunot uban kanila.”” Hum!

Mao kanang hinungdan nganong Iyang gipadala ang Espiritu Santo. Oh, mapanalanginong kasigurohan, nga si Jesus anaa kanako! Ako anaa Kaniya, ug Siya ania kanako; ang Amahan anaa Kaniya, ug Siya anaa sa Amahan; ug ang Amahan ania kanako, ug ako anaa Kaniya.

... nga si Jesus anaa kanako!

Oh, pagkaanindot nga pasiuna sa Balaanong himaya!

Usa ako ka manununod sa kaluwasan, nga gibayran na sa Dios,

Natawo sa Iyang Espiritu, kaniadtong gihugasan na sa Iyang Dugo.

Amen. Dili nako kini ibaylo. Oh, grabe!

Ang tanang mga rubi ug diamante, ug pilak ug bulawan,

Puno ang iyang panudlanan, Siya adunay mga bahandi nga dili maasoy.

Kay ako anak sa Hari!

Ako anak sa Hari!

Pinaagi ni Jesus nga akong Manluluwas,

Naghimo kanako nga anak sa Hari!

¹⁴¹ Amen ug amen. Dili nako kini ibaylo. Dili gyud nako kini ibaylo. Aduna ko’y duha o tulo pa nga Kasula-...

Ug, ania ang usa pa ka Kasulatan. Kung—kung ikaw puno sa Espiritu Santo, kana ang mga butang nga anaa kanimo. Kung ingon-ana unsa ka, sa kalibutan? Usa lamang ka lumalanyaw. Nasayod ko nga gabii na kaayo, apan dili pa ulahi ang tanan alang niini. Usa ra ka langyaw! Oh!

We’re pilgrims and we’re strangers here,

We’re seeking a City to come,

The lifeboat soon is coming,

To gather His Jewels Home.

¹⁴² Madungog nako ang tampisaw sa tubig didto sa Ohio River, niadtong batan-on pa ko nga magwawali, mga baynte-dos anyos

pa, ug ginakanta kana didto. Ug nadungog ko, sa ibabaw nako, ug nadungog ko ang usa ka Tingog, nga miingon, “Hangad ka.” Miabot kadtong Kahayag nga nagpaibabaw didto, mipaubos nganhi kanako, ug miingon, “Maingon nga si Juan Bautista gipadala aron sa pag-andam sa unang Pag-abot ni Cristo, makabaton ka og Mensahe nga maoy mag-andam sa ikaduhang Pag-abot ni Cristo.”

Oh, unsaon man nako sa pagtoo niadto? Apan nahitabo gyud mismo. Ug karong gabhiona ang mga kalayo sa maong rebaybal nagdilaab sa palibot ug sa tibuok kalibutan. Gibayaw sa mahimayaong tinubos nga Iglesia sa Dios ang Kaugalingon Niini gikan niining dapita, ug tungod niining dagkung mga buluhaton sa pagpang-ayo, ug mga ilhanan, mga katingalahan, ug mga milagro, nga ginapakita na ang Pag-abot.

¹⁴³ Usa ikaw ka lumalangyaw, ug usa ikaw ka estranghero. Lahi na nga mga butang ang imong ginabuhay, nga dili na sama sa imong ginabuhay kaniadto. Wala na ka nagapanglihok nga sama kaniadto. Ang mga tawo... Ang Espiritu Santo, pagmoanha na Kini kanimo, ug mapuno ka sa Espiritu Santo, wala mo na ginatagad ang mga butang nga iya sa kalibutan. Wala mo ginapanumbaling ang mga butang nga makapahasol kanimo. Wala mo na kini ginatagad. Mao nga nahimo ka nang usa—usa ka binuhay nga lahi og nilihokan, salikwaut ka, para kanila, ang gamay nga agila nga napusa ilalum sa salag sa himungaan; nga ako nang giwali, *Ug Sa Dihang Ginauyog-uyog Sa Agila Ang Iyang Salag*. Usa ka kataw-anan kon tan-awon nga binuhay, para nila.

Pero, oh, grabe, nagalakaw ka diha sa Highway nga iya sa Hari! Amen. Oh, kini usa ka Highway paingon sa Langit. Ug nagalakaw ako diha sa Highway nga iya sa Hari.

Moingon, “Tan-awa kanang holy-roller, kanang salikwaut. Mao kanang holy-roller nga magwawali.”

¹⁴⁴ Usa ka ilado kaayong Methodist nga magwawali ang mingon sa usa ka tawo, didto sa Louisville, miingon, “Gusto unta nakong tabangan si Igsoong Billy, pero kabalo ka kung buhaton ko kana? Ginabutang nako ang akong kaugalingon sa peligro.” Dili mo kinahanglan nga ibutang ang imong kaugalingon sa peligro alang kanako.

Gitahan Niya sa peligro ang Iyang kinabuhi para sa ako. Amen!...?... Paglakaw lang kamo diha sa Highway nga iya sa Hari, kana lang. Oh, grabe! Gipuno mismo sa Iyang Espiritu! Natawo pag-usab sa Iyang Espiritu! Gihugasan sa Iyang Dugo! Alleлуйа! Pagkamalipayon!

¹⁴⁵ Ug dayon usa pa, ngano, unsa man ang nakapatulod kanimo nga buhaton kana? Tawo man gihapon ka, apan unsa ma’y nakapahimo nimo niini? Tungod kay ikaw nagagikan man, ikaw,

ang imong Espiritu gikan man sa itaas. Ang Dios kini nga anaa kanimo.

¹⁴⁶ Niadtong miadto ako sa Roma, akong namatikdan nga ang matag usa, kanila, adunay Romanhong espiritu. Pag-adto ko sa Gresya, silang tanan adunay Gresyanhon nga espiritu. Pag-adto ko sa England; silang tanan adunay Ingles nga espiritu. Pagnagabisita ka sa mga lugar, makita nimo... Unya imong makita usab ang Amerikano nga espiritu; ngil-ad kini.

¹⁴⁷ Pag-adto nako sa catacomb sa San Angelo didto sa Roma, aduna sila'y karatula didto, "Palihog, mga babayeng Amerikano, pagsul-ob kamo og mga sinina, aron sa pagtahud sa mga patay." Amerikano nga espiritu.

Panid-i sila samtang nagapanaog sa eroplano, nga nanagsul-ob og hamubong mga bisti, ug ang tanan nagatan-aw kanila, ug ania na si Miss America. Mao kana ang espiritung Amerikano. Mahibaloan gyud nimo kung asa siya gikan; nagsinina'g, iya sa lalaki, nagagunit og iro nga poodle sa likod niya. Husto kana. Oh, oo, siya'y usa... Siya, siya ang America, Miss America; nga nagalakaw, kabalo na mo, nagakiaykiay nga sama niana. Ngano man? Aduna siya'y Amerikanhong espiritu. Apan si Jesus miingon, nagpamatuod Siya batok niini kaniadto, Siya miingon, "Taga-gikan ka niining yutaa sa ubos. Gikan Ako sa Taas."

Ug kung anaa kanimo ang Espiritu ni Cristo, gikan ka sa Taas, kung ingon-ana usa lamang ikaw ka lumalangyaw dinhi.

¹⁴⁸ Anaa kanimo ang kinaiyahan sa lugar nga imong gigikanan. Mao kana ang akong buut isulti. Ang usa ka Romano nga moanhi dinhi, magakalot na lang sa iyang ulo; mao usab kung ang Aleman monhi diri; mao pud ang mahitabo kung ang Americano moadto didto sa ubang lugar. Ngano man? Dala mo man gud ang espiritu sa mga nasud nga imong gigikanan.

Mao kana ang hinungdan kon nganong lahi kaayo kita sa panan-aw sa kalibutan. Gikan ka sa Taas. Didto ka natawo. Ikaw—usa ikaw ka lungsuranon sa laing Gingharian. Nagtoo ka ba niini? Ingon niana ang Espiritu Santo, himoon ka Niya usa ka lungsuranon sa Gingharian sa Dios.

¹⁴⁹ Nan, kung ikaw usa ka lungsuranon sa Gingharian sa Dios, sa unsang paagi diay ka palihokon Niini? Sama sa lihok sa Dios didto sa Iyang Gingharian. Karon, unsa ang ginabuhar sa Dios sulod sa Iyang Gingharian? Pagkabalaan, pagkamatarung, kaputli sa pangisip, kaputli sa hunahuna; Gahum ug gugma, nagasangyaw sa mga nahisalaag, nagapang-ayo sa mga masakiton, nagahimo'g mga milagro, nagapamuhar og halangdong mga butang. Mao nga, para sa kalibutan mora ka'g buang sa ilang panan-aw, ug sila moingon, "Kanang mga tawo wala gyud sa maayong pangutok." Kita n'yo? Apan usa ikaw ka lungsuranon sa Gingharian.

¹⁵⁰ Usa pa ka Kasulatan, kung gusto ninyo kining isulat, Juan 12:24. Tugoti ako nga mokutlo niini kaninyo sa makadiyut. Si Jesus miingon:

...kon *ang usa ka lugas sa trigo* matagak sa *yuta*...
gawas kon kini mamatay, kini dili makapamunga ug
laing kinabuhi.

Karon, tan-awa, alang sa akong panapos nga pahayag karon. Ug hinumdomi, nga, kini hingpit nga...Karon, kaninyong mga tawo, kini hingpit nga kinahanglanon ug importante, ug kinahanglan piliton ug pugson gayud, aron inyo nang madawat ang Espiritu Santo. Kay, kung dili ninyo madawat, dili gayud kamo maapil didto sa pagkabanhaw. Karon matikdi. Dili mahimong lapason sa Dios ang Iyang mga balaod. Nasayod kita niana. Ginatuman Niya ang Iyang mga balaod.

¹⁵¹ Karon, usa—usa ka lugas sa trigo, o mais, atong hisgotan, sama sa giingon ni Jesus kaniadto. Siyempre, ang—usa ka lugas, sa Biblia, bag-o ko lang nabasa kini karon, nagtumong kini sa lino o unsan nga matang sa liso, sama sa, trigo, sebada, mais, o unsa man, lugas kini. Apan kung ang usa ka lugas sa trigo mahulog sa yuta, karon, adunay...Kitang tanan dinhi nakakita na, nahibalo nga nagakahitabo kini. Ang usa ka lugas sa trigo, o usa ka lugas sa mais, mahimong mao gyud kini kon tan-awon, ug ilubong mo kini sa yuta, ug kung kana nga lugas...

Aduna kini'y makanunayon nga kinabuhi. Mailubong man kini karon, apan mosanay kini isip usa ka lindog; ug mailubong na usab, ug motubo pag-usab; ug mailubong na pud. Kinabuhi kini nga makanunayon.

Kung kanang lugas walay kagaw sa kinabuhi diha niini, bisan unsa pa kanindot kini kon tan-awon, dili gayud kini motubo. Malubong kini sa yuta ug madunot, ug diha ra kini kutob. Hinoon, ang mga salin nga materyales niini, mahimong gamiton isip abono diha sa yuta. Apan kung hisgotan ang pagkabuhi niini pag-usab, dili na gayud kini mabuhì gawas kung kini aduna og kinabuhing malungtaron. Nasayod niana ang si kinsa man. Ug dili mo na gyud kini mapatubo.

¹⁵² Mahimong adunay duha ka tawo, nga parehas kaayo sa usa'g usa, nga silang duha managsama ra gyud. Ang usa sa niining duha mahimong maayo kaayo nga tawo, maayo ang iyang mga binuhatan, mahimo niya ang mga ingon niana; apan gawas nga ang maong tawo adunay Kinabuhing Walay Katapusan diha kaniya, dili gayud siya mobangon didto sa pagkabanhaw. Dili niya kini mahimo; tungod wala ma'y butang dinha nga makapabangon kaniya. Walay butang diha kaniya nga puede siyang banhawon, walay Kinabuhi. Busa, nakita ninyo, akong minahal nga igsoong lalaki, ug igsoong babaye, gawas kon ang usa ka tawo matawo pag-usab, siya dili gayud makabalik niini nga Gingharian. Dili niya kana mahimo.

“Gawas nga kining Lugas sa trigo mahulog sa yuta ug mamatay.” Naghisgot Siya kaniadto sa Iyang Kaugalingon. Apan Siya adunay, dili kinabuhing malungtaron, kondili Siya adunay Kinabuhing Walay Katapusan; ug ang maong Kinabuhi Iyang gihatag kaninyo, aron kamo makabaton og samang matang sa Kinabuhi.

¹⁵³ Karon, kung aduna ka’y kinabuhing tawhanon lamang, nga igo ra aron mapalihok ka ug makapangibog, “Siya nga nagapatuyang sa kalipayan patay na samtang siya buhi pa,” dili gyud ka mabanhaw. Tingali ikaw ang labing inila nga babaye sa inyong eskuwelahan, tingali ikaw ang labing inilang babaye sa pagdula’g baraha sa inyong katilingban, Tingali ikaw ang labing maanindot magbisti nga babaye sa tibuok nasud, mahimong nga ikaw ang labing matahum, tingali ikaw ang may labing maayo nga lawas, tingali dinalayeg kaayo ka sa imong bana, tingali maayo ka niining tanang mga butang, nga, maayo man kana, apan, Igsoong babaye, gawas kon ikaw adunay Espiritu Santo diha kanim, nga mao ang Kinabuhing Walay Katapusan, sa katapusan niining panaw ikaw mahanaw ra.

Ug wala ko’y labot kung unsa ma’y imong panagway o kung unsa kining mga butanga, o kung unsa ka ka-dili inila o unsa ka man ka inila kaayo, unsa ka man kaanyag o unsa ka ngil-ad og nawong, kung aduna ka’y Kinabuhing Walay Katapusan, magapuyo ka *Didto* hangtud-hangtud ug hangtud-hangtud.

¹⁵⁴ Sa dihang mawala na ang bulan ug ang mga bitoon, ug mobakho na ang yuta ngadto sa kabukiran ug mga disyerto, ug ang tanan, mawala na, mahanaw na, ug ang kalibutan nagsusapinday sama sa usa ka hubog nga nagapauli sa gabii, ug ang mga bitoon nagdumili na sa pagdan-ag, ug nangahulog gikan sa langit, ug kolor sa bulan nahimong dugo, ug ang—ang adlaw namula ug nagtago sa iyang nawong, sa dihang ilang makita ang Anak sa tawo nga nagaabot, apan ikaw modan-ag diha sa pagkamatarung ni Jesus Cristo, nga mogula gikan sa lubnganan isip usa na ka batan-on, matahum nga babaye, ug tagbuon ang imong kapikas, ug mabuhi sa hangtud-hangtud ug hangtud-hangtud ug hangtud sa kahangturan, ug sa Walay Katapusang mga kapanahonan ikaw mabuhi. Mao kana ang katuyoan sa Espiritu Santo.

Pagmabati nimo bisan ang pinakagamay nga pag-bira Niini, ayaw Kini balibari.

¹⁵⁵ Unsa man ang Espiritu Santo? Ang Dios kini nga anaa kanim. Para sa unsa Kini? Kini alang sa pagpadayon sa Iyang buhat taliwala sa Iyang katawhan; ug aron sa paghiusa sa Iyang Iglesia, aron dad-on ang Iglesia ngadto sa usa ka kahimtang niining panahona, nga labaw pa sa panahon sa Lutheran, Methodist, ug sa mga Pentecostal, paingon sa usa ka kahimtang sa pagkasagop ug sa grasyang Makapasakgaw. Nga, sa dihang

kini nga bahin sa Iglesia, pagmosulod na ang Espiritu niining Iglesia dinhi, kini magabangon; ug ipabangon niini, ipabangon niini ang tanang mga tinubos nga nakahikap nianang Espiritu.

Kadtong mga Lutheran nga nagbarug kaniadto uban niadtong tibuok kahayag nga atua kanila, diha sa pagpakamatarung; kadtong mga Methodist nga gipangsabyagan og tubig ang ilang nawong, gumikan sa pagkatumba nila sa salog, tungod sa Espiritu nga miigo kanila diha sa pagpabalaan; kadtong mga Pentecostal, nga naglakaw-lakaw didto sa dalan ug gitawag sila'g mga "linggwista," ug, oh, "mga tigkutabkutab," ug mga nanagsulti og "pinulongan sa gansa" ug tanan nang ingon niana; sila magabarug diha sa pagkamatarung, sa atubangan sa Dios nianang Adlaw, sa ingon ka sigurado nga kining Biblia napahimutang dinhi. Kung nagatoo ka nga ako usa ka sulugoon... Gitawag ninyo ako nga Iyang propeta; apan wala ko ginatawag ang akong kaugalingon nga ingon niana. Apan, paminaw mo, ginasultihan ko kamo sa Ngalan sa Ginoo. Kadtong mga anaa kang Cristo dad-on sa Dios uban Kaniya sa Iyang Pag-abot, sa pagkabanhaw, ug kadto lamang nga anaa kang Cristo.

¹⁵⁶ Sa unsang paagi kita makasulod kang Cristo, mga igsoon?

"Pinaagi ba sa usa ka kredo nga kitang tanan napahisakop"? Dili.

"Pinaagi ba sa usa ka pagpakiglamano nga kita nakasulod"? Dili.

"Pinaagi ba sa usa ka tubig nga kitang tanan nabautismohan"? Dili.

O, "Pinaagi ba sa usa ka denominasyon nga kita nakasulod"? Dili.

Apan, "Pinaagi sa..." Unang Mga Taga-Corinto 12:13, "Pinaagi sa usa ka Espiritu," Espiritu Santo, Espiritu sa Dios, "kitang tanan..." Methodist, Baptist, Lutheran, Presbyterian, "Maglakaw kamo diha sa Kahayag, ingon nga Siya anaa sa Kahayag, kita magpakig-fellowship sa matag-usa, ug ang Dugo ni Jesus Cristo, nga Anak sa Dios, magahinlo kanato gikan sa tanang pagkadili-matarung." "Pinaagi sa usa ka Espiritu gibautismohan kitang tanan ngadto sa usa ka Lawas, ug nahimong mga umalambit sa Iyang grasya."

¹⁵⁷ Dili na kamo mopaingon sa Paghukom. "Siya nga nagapatalinghug sa Akong mga Pulong ug nagatoo." Walay tawo ang mahimong motoo gawas kung aduna siya'y Espiritu Santo. "Ug nagatoo Kaniya nga nagpadala Kanako," sa dihang gipamatud-an na sa Espiritu Santo ang Iyang pagkabanhaw. "Adunay Kinabuhing Walay Katapusan, ug dili na pagahukman sa silot, apan siya nakalabang na gikan sa kamatayon ngadto

sa Kinabuhi.” Unsa? Dili ka na gayud Pagahukman. Dili ka na moatubang didto sa Puting Trono para sa paghukom.

Nadawat na nimo ang imong paghukom dinhi. Nalabang na nimo ang imong paghukom sa dihang ikaw na mismo ang nagpahamtang ug miingon, “Dili ko maayo, ug walay pulos ang akong mga nakat-onan. Ginoo, sulod kanako, ug dawata ako ug giyahi ako, Ginoo. Wala ko’y labot bisan unsa pa ang isulti niining nabuang nga kalibutan. Giyahi ako, Ginoo, pinaagi sa Imong Espiritu.” Nahukman ka na kung ingon-ana. Hukmi ang imong kaugalingon ingon nga usa ka buang-buang alang kang Cristo, ug, diha sa Iyang pagkamatarung, aron nianang Adlawwa kita magabarug nga wala na’y kamatayon nga sama na sa Iyang dagway.

¹⁵⁸ Usa ra gyud ka paagi. Unsang paagi? “Pinaagi sa usa ka Espiritu gibautismohan kitang tanan ngadto sa usa ka Lawas.” Ug sa dihang nakasulod ka na nianang Lawas, human na man gud gihukman kana nga Lawas, gidawat nimo Siya ingon nga bayad sa imong sala.

Moingon ka, “Nabuhat ko na kana, Igsoong Branham.”

Ug, kung mibalik ang Espiritu Santo ug maghatag kanimo og selyo ingon nga usa ka ilhanan, ginadala ka niana nga Espiritu pasulod sa Lawas ni Cristo. Lahi na nga dalan ang imong ginaasoy, ug ikaw usa na ka bag-ong binuhat diha kang Cristo Jesus. “Nakalabang ka na sa kamatayon ngadto sa Kinabuhi. Ang daang mga butang nangagi na, ug bag-o na ikaw diha kang Cristo!” Amen!

¹⁵⁹ Oh, kung mahimo, tugoti ako sa pagdani kanimo, akong Cristohanong igsoong lalaki o babaye. Ayaw itugot nga kini nga rebaybal molabay lang kanimo. Kinahanglan mong madawat ang Espiritu Santo. Unsa man Kini? Ang Espiritu sa Dios. Para sa unsa Kini? Aron sa pagpanguna kanimo, paggiya kanimo, pagpuno kanimo, pagbalaan kanimo, pagtawag kanimo paggawas, pasulod sa Iglesia.

Unsa man ang iglesia, unsa man ang ginapasabot sa pulong nga *iglesia*? “Mga gitawag pagawas, mga linain.” Oh, kung makawali lang gyud ko unta mahitungod niini! “Mga gitawag pagawas, mga linain,” mga lumalangyaw, layo sa kalibutan, magpapanaw ug estranghero, nagapamahayag nga kita dinhi walay yutan-ong siyudad nga atong gitinguha nga puy-an. Oh, grabe!

¹⁶⁰ Sama ni Abraham, ug ni Isaac, ug ni Jacob, nga mga dumuloong lamang, nanagpuyo sa mga balongbalong sa yuta. Sila nagaangkon nga sila mga magpapanaw ug mga lumalangyaw lamang, mga kaliwat sa manununod, sa maong manununod kaniadto; ang amahan, nga manununod. Kita ang ilang mga kaliwat. “Ug ginapangita nila kaniadto ang Siyudad

Nga ang Magtutukod ug Magbubuhat mao ang Dios.” Amen. Nangita sila.

¹⁶¹ Ug, hangtud karon, ang ilang kaliwat nagapaabot pa gihapong nianang usa ka Siyudad nga moabot, nga nagaingon, “Ayaw kong magpahiuyon niining kalibutana. Ayaw kong magkaaduna og bisan unsa man nga kahilambigitan niining kalibutana. Ang gusto ko, nagapaabot ako sa Siyudad nga kuwadrang pagkatukod. Nagapaabot ako sa usa ka Siyudad nga adunay Kinabuhing Walay Katapusan, diin ang adlaw dili na mosalop, diin wala na’y katigulangon, diin wala na’y panapto’ng krep nga gipabitay diha sa kuptanan sa pultahan, o lubnganan sa kilid sa bungtod. Ginapangita ko kana nga Siyudad, Nga ang Magtutukod ug Magbubuhat, mao ang Dios.”

¹⁶² Adunay usa lamang ka paagi nga makit-an kini. “Adunay usa ka Bato nga gitapyas gikan sa bukid, nga dili pinaagi sa mga kamot, nga miligid ngadto sa kalibutan ug nagdugmok niini, ug kini nahimong sama sa trigo . . . o tahop sa giokanan.” Himoa kanang Bato, nga mao si Cristo Jesus; kanang Bato nga kapandolan para sa kalibutan, usa ka Bato nga makapasilag, usa ka gibiyaybiayan nga Bato, usa ka kapandolan sa iglesia; apan usa ka bililhon ug usa ka Batong Madanihon alang sa magtotoo, usa ka Bato sa kasigurohan, usa ka Bato sa kapahulayan. Oh, grabe!

Nagapahulay na! Ako nahibalo nga ako nakalabang na sa kamatayon ngadto sa Kinabuhi. Ang akong kalag anaa sa kapahulayan. Oh! “Umari Kanako kamong tanan nga gikapuyan ug gibug-atan, ug papahulayon Ko ang inyong kalag.” “Usa—usa ka ilhanan nga pagasultihan og dautan,” ingon sa—sa propeta kang Maria. Kini mahimong usa ka ilhanan, sigurado, mamahimong ingon niana gayud. Apan kini mahimong usa ka kasigurohan usab. Kini mahimong gugma. Kini mahimong katagbawan. Butang kini nga mahibaloan mo nga nakalabang ka na gikan sa kamatayon ngadto sa Kinabuhi.

¹⁶³ Akong igsoong lalaki, ug babaye; ingon nga ako imong igsoon, ingon nga imong sulugoon diha kang Cristo, tugoti ako sa pag-awhag kanimo, sa tibuok kong kasingkasing. Ayaw gyud itugot nga molapas ra kini sa imong ulo, o moagi lang sa kilid mo, o sa ilalum nimo. Dawata Kini sa imong kasingkasing, ug mahimo kang malipayon nga tawo dinhi sa yuta.

Dili ko mosaad nimo nga makadawat ka og usa ka milyon ka dolyares. Dili, sir. Igsoong Leo, nagtoo ko nga daghan na kaayo’g ingon niana nga saad karon, “minilyon ka mga dolyares,” mga butang nga ginasulti sa uban. “Kung ikaw kono mamahimong Cristohanon, makadawat ka og usa ka milyon ka dolyares ug mahimo kang adunahan nga tawo.” Wala ko’y ginasaad kaninyo og bisan unsa man.

Kini ang ginasaad ko kaninyo, ang bugtong butang nga mahimo kong isaad kaninyo: ang Iyang kaluwasan. Ang Iyang

grasya nga igo sa tanang pagsulay. Ang mga tawo kaniadto sa Pentecostes, dili gani nila gusto kung unsa ang anaa kanila. Karon hisgotan pa kining pagka-milyonaryo? Dili nila gusto kaniadto kung unsa ang anaa na kanila, Igsoong Angie.

¹⁶⁴ Gusto kong madungog ka unta ug si Gertie nga nagakanta, usa niining mga adlaw (Asa siya?), *Homecoming Week*, usa niining mga adlaw. Daghan na sa ilaha ang mitabok nianang utlanan sukad kaniadto. Oh, grabe!

Wala sila nangayo og dagkung mga butang. Wala sila nangayo og salapi. Aba, si Pedro miingon, “Wala ako’y salapi bisan bulawan, apan ang ania kanako, igahatag ko kanimo.”

Ug isulti ko kana karong gabhiona, mga higala. Ang kalipay, ang gugma, ang kasigurohan, nga akong nabatongan kang Cristo ug sa Iyang pagkabanhaw, kung unsa kini, ihatag pud nako kaninyo; Ihatag nako kaninyo, isip mga anak ko sa Dios.

Duol lang ug magpabilin diha sa krus kung ikaw gitawag sa Dios, ug ayaw dayon pagtindog. Pag-anhi ninyo dinhi ugma sa gabii, puede kang moari ug magpabilin mismo dinha hangtud nga madawat nimo, o moari ka sa unahan aron maampoan ka namo ug mapandongan sa mga kamot. Sige. . . Mao kana ang sugo sa Biblia, pandongan sila og mga kamot alang sa Espiritu Santo. Ug dayon mamauli na tà, mamauli na kamo sa inyong panimalay. . . Kung gusto mong magpabilin dinha, kung magpabilin ka sa tibuok gabii, magpabilin sa sunod nga adlaw, magpabilin sa sunod pa nga adlaw, bisan sa tibuok bakasyon, magpabilin hangtud sa bag-ong tuig, nga magpadayon dinha, sige magpabilin ka dinha hangtud.

¹⁶⁵ Kanang, kung unsa man ang among itudlo ugma sa gabii, nga ipakita kaninyo diha sa Biblia kung unsa ang kinahanglan mahitabo, mahitabo gyud kana. Ug pagmahitabo na Kini, nan wala’y igong mga yawa didto sa impiyerno ang. . . Masayod ka mismo nga nakalabang na ka gikan sa kamatayon ngadto sa Kinabuhi. Ikaw usa na ka bag-ong binuhat diha kang Cristo Jesus. Ang mga lingganay sa kalipay didto sa Langit mobagting.

¹⁶⁶ Igsoong Othal, sultihan ta ka, makapadilaab gyud Kini kanimo. Ania ang usa ka tigulang na nga lalaki nga naglingkod dinhi, dugay ko nang suod nga igsoon, nga usa ka tulisan kaniadto nga may dalang mga pusil sa iyang kilid pagnagalakaw, nagapangita’g tawo sa kung asa man, nga mahimo niyang pusilon. Apan unsay nahitabo? Usa ka adlaw nangita siya ug mitoo paingon sa Kinabuhi. Ug siya mipadayon. Gisundan niya akong mga panagtigum. Ug kining kabus nga tawo, walay igong makaon, ug naghigda lang didto sa kasagbotan kilid sa balongbalong, nga gigutom ug giuhaw. Ug usa ka adlaw miabot ang Balaang Espiritu. Oh, igsoon ko, gibago ka Niini, dili ba? Nagdala kini og Kinabuhi, ug gitangtang ang kamatayon. Nawala ang pagdumot, ug misulod ang gugma. Oh,

grabe! Nawala na ang panag-away ug panaglalisay; misulod na ang bag-ong Kinabuhi.

Tan-awa n'yo dinhi kung unsa ka daghan sila, aduna pa'y uban, ug sa tibuok dinha. Oh, ang lingganay sa kalipay didto sa Langit nagabagting gayud! Mga higala, wala gyu'y paagi kung unsaon ko pagpahayag niining ginabati ko.

¹⁶⁷ Paminaw, aron matapos ko na kini, kung kamo nagatoo sa akong pagpamatuod, ingon nga usa ka alagad ni Cristo, ug naningkamot sa pagpakita kaninyo gikan sa Biblia sa Dios nga kini husto. Ug kung medyo lahi ang akong mga ginasulti mahitungod niini, tan-awa n'yo lang kanang litrato ha diha sa siyentipiko nga kalibutan. Matikdi n'yo ang bunga, niining Haligi nga Kalayo nga nanguna sa mga Anak sa Israel kaniadto, matikdi ang bunga nga ginapamunga Niini. Tan-awa kung unsa ang ginabuhat Niini, kung unsa ang ginasulti Niini.

Dili kini ako nga nagasulti; kondili Siya kini nga nagasulti pinaagi kanimo, nakita n'yo. Dili ako ang nakakita sa panan-awon; kondili Siya kini nga nagasulti pinaagi kanimo. Dili ako ang nagaayo sa mga masakiton; apan Siya kini nga anaa kanimo, ang maoy nagaayo sa mga masakiton. Dili ako ang nagawali; Usa ako ka maulawon nga talawan, ug nagalikay gyud niini, apan Siya mao man ang nagapanulti. Wala ko'y kahibalo sa Pulong; apan Siya nahibalo Niini. Ingon niana. Ingon niana lang gyud. Ingon niana kini.

Ug ania Siya karon. Kanang mao mismong Manolunda sa Dios ania mismo niining bilding karong gabhiona. Oh, gihigugma ko gayud Siya!

¹⁶⁸ Karon pila ang gustong makadawat sa Espiritu Santo? Susihon nato ang atong kinabuhi. Pila man ang wala makadawat pa Niini, apan nagtinguha? Ipataas ang inyong kamot, moingon, "Igsoong Branham, sa kinahiladman sa akong kasingkasing, gusto kong madawat ang Espiritu Santo." Panalanginan kamo sa Dios, tibuok bilding mismo.

¹⁶⁹ Pila kaninyo ang nakadawat Niini, ug gustong mopadayon sama sa ilang gibuhit kaniadto diha sa Mga Buhat 4, ug moingon, "Oh Ginoo, Oh Ginoo, ituy-od ang Imong kamot sa pag-ayo, ug nagpakita sa mga ilhanan ug kahibulongan sa Ngalan sa Imong balaan nga Anak nga si Jesus, ug ihatag kanako ang tanang kaisog ug gugma, sa pagsulti, ug ang bag-ong pagpuno"? Oo, ania usab ang sa akoa. Dios, ihatag usab Kini kanako.

Iduko nato ang atong mga ulo, nga halawum ang pagkasinsero, ang matag usa nga ginahuptan ang maong tinguha diha sa inyong kasingkasing.

¹⁷⁰ Ginoong Jesus, amo nang ginatapos kining gamay nga panagkatigum karong gabhiona, human sa panag-ambitay sa

Pulong ug sa Espiritu Santo. Pagkadako sa Iyang panalangin kanamo ug pagbubo sa lana sa Iyang Pulong nganhi sa among mga kasingkasing! Adunay mga ministro, adunay mga tawo dinhi nga gikan pa sa nagkalainlaing mga kahimtang sa kinabuhi, nga nakatilaw ug nakasaksi nga maayo gyud ang Ginoo. Nahibaloan na namo kung unsa ang Balaang Espiritu karon, nga kini usa ka saad sa Dios. Kini mao ang Kinabuhing Walay Katapusan alang sa tanang nagatoo.

¹⁷¹ Ug nahibalo kami nga ang Espiritu Santo mao ang Espiritu ni Jesus Cristo nga gipadala balik, ug Siya ania kanamo karon. Ingon nga ang Dios anaa ibabaw kanamo kaniadto, sa nianang Haligi nga Kalayo; dayon Siya naglakaw uban kanamo, diha sa . . . usa ka lawas nga gitawag og *Emmanuel*, “Ang Dios nga uban kanato”; ug karon ania Siya sa sulod namo, pinaagi sa Espiritu Santo, ang Dios nga ania kanamo. Oh!

Si Jesus miingon, “Nianang adlaw masayod kamo nga Ako anaa sa Amahan, ug kamo ania Kanako, ug Ako anaa kaninyo. Makasabot ra kamo nianang adlaw. Tungod, anaa pa kamo sa kalibutan sa kangitngit, sama sa ingon nato niini, karon, apan nianang adlaw makasabot ra kamo.”

¹⁷² Amahan, dili gyud kini mapatin-aw ug mahingpit, tungod kay kung ingon niana para sa unsa pa nga magkinahanglan kami og pagtoo. Apan ang tanang mga buhat sa Dios gidumala pinaagi sa pagtoo. Ug pinaagi sa pagtoo sa Imong Pulong, sa pagpanghimatuod sa Balaang Espiritu nga among nahibaloan na karon, ginahangyo ko nga ang matag gigutom nga kalag dinhi mapuno sa Espiritu Santo. Kadtong wala pa Niini, ug mao siya nga gigutom alang Niini, hinumduman lamang. . . Isulti namo kanila, Ginoo, sama niining Imong giingon, “Bulahan kamo kon kamo gigutom ug giuhaw. Kay kamo pagabusgon.” Usa kana ka saad. Ug bulahan pa gani kadtong mga gigutom. Bulahan ka nga mahibaloan lang nga nakigsulti kanimo ang Dios, kay Kini nag-ingon, “Walay tawo ang makaduol Kanako gawas kung ipaduol siya sa Akong Amahan.”

¹⁷³ Ug, Ginoo, kadtong mga tigulang na nga beterano dinhi, ilang gipataas ang ilang mga kamot. Ginapataas ko usab akong kamot. Oh Ginoo, hatagi kami’g kusog, hatagi kami og Gahum sa pagtuy-od sa kamot sa Imong balaang Anak nga si Jesus, nga ang mga ilhanan ug mga kahibulongan mahitabo unta, nga kini mamahimong usa ka mas lawum na nga ministeryo, mamahimong mas gamhanan kay sa kaniadto. Hatagi kami ug kaisog ug gugma, sa pagsulti sa mga tawo. Itugot kini, Ginoo. Ubani kami sa tanang butang, amo kining ginapangamuyo sa Ngalan ni Jesus.

¹⁷⁴ Ug ugma sa gabii, Ginoo, hinaut nga moabot ang sama sa usa ka nagahuros nga makusog nga hangin, maibubo dinhi nga bilding, nga mamahimo kining sama kaniadtong Adlaw

sa Pentecostes. Ang pundasyon napahimutang na. Andam na ang tanan. Ang mga baka naihaw na, ang mga pinatambok nga mga mananap naihaw na, ang mga nating karnero naihaw na; nahiandam na ang lamesa, ania na ang mga dinapit. Oh Ginoo, ipadala ang jubileo sa Pentecostes, ugma sa gabii, pasulod niining bilding, ug pun-a ang matag kalag sa bautismo sa Espiritu Santo. Itugot kini, Amahan. Amo kining ginapangamuyo, sa Ngalan ni Jesus. Amen.

We'll learn a lot of things,
 We'll have a harp that's made of gold,
 Perhaps a thousand strings;
 We'll sing and shout and dance about,
 The Lamb will dry our tears;
 We'll have one grand homecoming week,
 The first ten thousand years. (Amen!)

The precious Blood of God's Own Son has
 cleansed and sanctified
 A wondrous people for His Name and they are
 called the Bride.

Though here neglected and despised, one day
 the Lord will bring

Those chosen ones within the gate, and that's
 worth everything. 

59-1217 Alang Sa Unsa Gihatag Ang Espiritu Santo?
Branham Tabernacle
Jeffersonville, Indiana U.S.A.

CEBUANO

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org